


明三十家詩選 一

仁。劉基
高啓

九拾四首

百七拾五首

柳田文庫
文庫11
D 173
1



新

文庫 11
D 173
/

初	家	四
集	譜	三
	解	十

010190557745

同治癸酉十月
蘊蘭吟館重築

柳田氏藏

記夢

余編明三十家詩既竣夜夢至古寺殿中設一龕上有蓮
臺塑一立像紗帽絳袍白鬚偉貌長三尺許旁一褐衣媪
笑謂余曰子識之乎此豐干禪師也在明代爲宋景濂今
成佛矣子盍拜之余曰果文憲公耶余生平所敬也亟拜
之既謂媪曰文憲公在此則劉文成高太史諸公亦應有
像余皆欲拜識之媪指別室曰皆在是子自識之余步入
見塑像數十軀有衣冠者有儒巾服者有戎裝擐甲者有
蓑笠者其前皆有栗主題姓氏余欲諦視而爐煙繚繞蔽
其字不得見遂遽然寤因自咎曰明初開國劉宋並稱青
田以謀略著潛溪以文章顯今文成詩褒然首列而文憲

詩獨未入選公之遺憾一也且余是選頗有知人論世之意如青邱孟載志道同文清江海叟西涯二泉大復升菴昌穀茂秦滄溟鳳洲大樽茶村諸家詩前咸有論斷凡數百年毀譽失寔之案無不爲之更正湔洗而於文憲獨無一言公之遺憾二也且夫文憲事明祖數十年處師儒之重罪涉疑似旣誅其子孫猶不少寬假幾致湛身嗣以馬后太子力救尙不免謫死蠻荒不得歸葬亦可悲矣而鳳洲雜編且列之於元官王守溪筆記亦敘其曾爲元編修夫文成仕元者再尙不足損其佐命之勛文憲仕元亦復何害且考明史本傳載其至正中薦授翰林編修以親老辭不行入龍門山著書文成集中亦有送公入道辭歷朝

詩集明詩綜皆載公辭官入道之事則其未經仕元確有可據而鳳洲諸人凌轢前輩且并其出處大節污之是誠何心哉 翁大人著秣陵集於明初文武諸臣冤獄皆有所辯白澄衷論劉文成事及七姬權厝志論於青邱來儀仲溫公武亦昭雪甚至余於有明諸公主持公論亦自謂不遺餘力而于公蓋闕如者以公之詩才力亦甚博大惟不及其文之精純且余所選又以詩存人而非以人存詩之比苟令列諸正選未免遷就列諸附錄又患輕褻故竟不入選乃自爲一書之例也不選其詩因不論其事亦此書例也而公之屈抑遂不得附此書以明於後世因以系夢於余耶余維公人品最正學問最醇翊贊最久獻替最

多且精通釋典則其爲豐干後身生天成佛亦理所應有
余幸得於夢中辦香禮之雖未錄其詩而不可不論其人
因附列之以志吾過且以爲天下後世苛論前哲污蟻名
賢者有所戒焉或謂昔顧俠君選元詩竣見古衣冠數百
人來謝今余於夢中亦見塑像數十人煙雲供養靈爽式
憑卽以是爲余闡幽發隱之功也則余豈敢

嘉慶庚辰孟冬十日汪端記

序

選詩之家大要有二曰以人存詩以詩存人以人存詩則
失之濫而無當別裁之旨以詩存人則失之嚴而罔具尙
論之識求通兩家之驛去其失而兼其美者曷曷乎其難
矣允莊夫人汪季懷先生愛女也幼稟庭誥溺苦於學所
好尤在五七言其自漢魏六朝三唐兩宋諸家靡不博覽
而窮涉之故所著自然好學齋詩沈雄古厚繇渺悱惻掃
盡脂粉習氣每一篇出驚倒耆宿洎歸孟楷司馬則琴調
瑟應益入詩國而游其所論議與所倡和皆極命古今盧
牟衆有視古秦徐管趙者流蔑如也歲庚辰取前明一代
之詩甄綜決擇自劉文成以迄夏節愍爲三十家詩選釐

爲初集二集每卷於正選後附錄同時諸家以分主客每家繫以事略旁采各家評論以備參考大旨以詩爲斷而或其人勲業操行有足以昌其詩而重其詩者則仍列正選以垂激勸於別裁之中寓尙論之意精思慎擇閱三年而始竣以余亦嘗究心此事也削橐相示屬爲之序余惟選明詩者兩家竹垞之明詩綜則重在人歸愚之明詩別裁則重在詩均爲善本而均不能無或嚴或濫之失甚矣選政之難也今觀茲選論詩則務取清真力刪俳僞論人則務崇名節堅斥邪僻洵能兼兩家之美而去其失者吾知茲選一出實足以嘉惠藝林裨補風化而匪僅爲閨閣之傳書也余茲衰晚搨搨米鹽不復能耽詞翰而於茲選獨不辭而序之者誠以夫人之詩爲當代僅見之才而茲選又當代不可廢之作有樂與之論而幸覩其成者是用弁以荒言質之來學知竹垞歸愚兩先生復起亦將不易斯言也是爲序

道光二年歲次壬午長至日長洲墨琴女史曹貞秀序於里門之寫韻軒

序

明三十家詩余女甥汪允莊所選定允莊爲女兒應銷季
女祖千波早年成進士觀政刑部年二十四乞假歸不復
出藏書之富甲於武林父天潛博學工詩隱居不仕諸子
女皆能讀書允莊尤慧年七歲賦春雪詩居然成章誦木
元虛海賦兩過卽背誦不遺一字觀書過目不忘蓋異才
也適同里陳孟楷公子孟楷爲雲伯大令子大令以詩文
名海內孟楷承其家學蚤歲有聲先伯父學士山舟先生
夫子周生先生皆激賞之論者有金童玉女之目茲集之
選雖曰詩選實史論也蓋前明三百年自高帝以馬上得
天下草菅文士成祖以叔攘姪芟雍忠良中間奄人權相

望塵接踵又以制義取士詞章古文無真知灼見雖有前
後七子主壇坫者務以聲氣相高文章之途有市道焉虞
山蒙叟列朝詩選富矣冗雜無次序小長蘆鈞師明詩綜
較有次序亦博而不精沈歸愚明詩別裁卽明詩綜約選
之沿襲皆前人舊說無足觀覽今允莊所選以清蒼雅正
爲宗一掃前後七子門徑於文成青邱清江孟載諸人表
章尤力至於是非得失之故興衰治亂之源尤三致意焉
讀是書者不特三百年詩學源流朗若列眉卽三百年之
是非得失亦瞭如指掌選詩若此可以傳矣余讀此而悲
女兄之早逝不得見女甥之學問成就如此也余又幸女
兄雖逝而女甥之學問成就有如此也讀而歸之書其簡

端卽以爲序

道光二年壬午正月錢塘楚生內史梁德繩書於古春軒

明三十家詩選原校女士姓氏

初集

卷一

錢塘孫雲鳳碧梧

卷二

長洲李佩金晨蘭

卷三上

昭文席佩蘭道華

卷三下

常熟歸懋儀佩珊

卷四

仁和孫琦茗玉

卷五上

常熟屈秉筠宛仙

卷五下

華亭廖雲錦織雲

卷六上

金匱楊芸蕊淵

卷六下

新城陳德卿雪蘭

卷七上 錢塘湯繡娟湘綠

卷七下 錢塘汪 筠初青

卷八上 錢塘金 芾召南

卷八下 無錫華雲芝鶴田

二集

卷一上 錢塘管 筠靜初

卷一下 吳縣席慧文怡珊

卷二上 歸安王 鈿蘭上

卷二下 秀水王蕙芬采仙

卷三上 錢塘陳華奴萼仙

卷三下 錢塘陳麗奴茗仙

卷四上 丹徒王 瓊碧雲

卷四下 金匱顧 翎羽素

卷五上 錢塘汪 嘉靜宐

仁和錢 珮楚長

卷五下 錢塘孫雲鶴仙品

錢塘孫雲鵬嫺卿

卷六上 仁和韓淑章蓮生

歸安王德柔韞容

卷六下 粵東黃之淑蘭姬

卷七上 德清許延初因姜

德清許延錦雲姜

卷七下

錢塘黃

吳蕉卿

錢塘湯

蘅小谷

卷八上

錢塘李素娥琳仙

錢塘李錦娥蓉仙

卷八下

上元王子蘭紫湘

凡例

昔元遺山中州集顧俠君元詩選所選諸家咸繫以事略
茲選仿之兼載其論詩之語及所著諸書以備參考亦知
人論世之意也惟劉文成偉績奇勲焜耀史冊毋俟贅言
故節錄其出處大概以別于諸家焉

梁鍾記室嶸論詩分上中下三品明高棟唐詩品彙亦分
正始正宗大家名家羽翼接武正變餘響旁流九等選詩
貴別流品其來尚矣是選初集諸家猶主盟之晉楚也二
集諸家猶列國之宋鄭魯衛也附錄諸家猶附庸之邾莒
杞薛也後之覽者平心綜覈自見其才氣分量實有不可
移易之故正非妄為軒輊至李空同其人與詩雖不足道

然前後七子之名裒然居首沿襲已久故仍錄之初集猶唐十八學士之有許敬宗南宋四將之有張循王也

集中附錄諸家與正選者或係昆季或係師友或同里或齊名或詩格相似或出處相符均從附列以見淵源然必其詩足以峙美方從采撮若如南園五先生閩中十才子正嘉七子四皇甫之屬皆有取舍此亦不敢因類濫列之意

諸家評語毀譽並存旨取賅備明詩綜之例如此茲去其偏憎私愛之說但擇平允精當者存之願道堂集暨澄懷遇有論議亦錄于後而端之一知半解附焉至其人文章軼事問亦論斷及之此又仍竹垞明詩綜例也

樂府

劉基、高青邱

何景明、徐禎卿

謝榛

五言古

劉、高、何、徐、洪

陸世儀、楊基、林鴻

樂府之體語近情深含蓄微婉不必模範漢魏而始謂之復古也就明代論之劉文成鬱伊善感歛歛欲絕離騷之苗裔也高青邱清華朗潤秀骨天成唐人之勝境也何大復源於漢魏開寶而能自抒妙緒徐昌穀六朝風度嫺雅絕倫謝茂秦小樂府最為擅場閨情邊塞不減王少伯李君虞之作凡此數家自當為樂府正宗而李西涯之詠史王鳳洲之敘事陸桴亭之激揚忠孝則皆變體之正也若李滄溟掃摛剽擬詞義艱晦竹垞斥為妄人也固宜五言古元季多近纖靡劉文成起而振之醇古適鍊抗行杜陵青邱得柴桑之真樸輞川之雅澹可稱異曲同工他如張志道之宏朗楊孟載之蒼奇林子羽追琢工秀不在

高、貝瓊、張以寧、
何、陳子龍、陸、
李夢陽

七言古

常劉以下正嘉間大復骨重神寒昌穀清聲古色皇甫昆
季圭臬三謝高子業接跡曲江此皆一時之雋足相羽翼
華子潛歸季思吳凝父李長蘅錢飲光張祖望諸人規撫
林壑清曠絕塵亦不媿隱逸詩人之目若顧亭林磊落莫
多陸桴亭雄深淵雅則又獨闢門徑前無古人矣

七言古明初青邱沉鬱宏逸兼太白杜韓之長貝清江張
志道鮮明緊健頗近元遺山虞道園二家孫仲衍學岑嘉
州明雋清奇善言風景李草閣歌行學杜材力馳騁足以
赴之惜波瀾較少耳宏正間諸家多宗少陵寔自西涯啟
之而大復雄麗尤為奇玉明珠嘉隆以下作者殊寡鳳洲
富健尚欠安詳滄溟浮鷺更不足取其後陳忠裕夏節愨

格古意新陸桴亭才氣無前陳元孝語能獨造撐持末季

深賴此數公焉

五言律
青邱、貝清江

五言律文成俎豆少陵青邱上法右丞下參大歷十子貝
清江以溫厚勝張志道以瑰麗勝楊孟載以清新勝袁海
叟以秀潔勝林子羽以精鍊勝程節愨以雅正勝大復于
李杜王岑均能神肖昌穀嗣襄陽之清音茂秦振嘉州之
逸響可稱極盛王鳳洲陳忠裕夏節愨桴亭亭林元孝氣
格沉雄自是大家而邊華泉皇甫子循高子業區海目鄙

湛若趣味澄曼如清沈之貫達亦猶畫家逸品也

七言律文成激昂悲感青邱超妙清華足稱兩雄並峙貝
清江張志道楊孟載林子羽程節愨甘彥初張來儀諸家

七言律

西涯李東陽詩

功力純熟詞旨葱蒨均堪媲美渾雅則推西涯秀朗則推大復爽健則推茂秦滄溟雖高華精麗而用字雷同易取人厭昔人嘗集其江湖乾坤落日浮雲秋色風塵中原吾輩等字為詩戲之故非惡諛鳳洲雄濶惜乏深思宋云貴品陳忠裕夏節愍珍詞繡句雅練莊嚴亭林禔亭元孝開闢渾涵龍驤虎步並為絕調此外邊華泉徐惟和兄弟曹志節程孟陽諸家圓秀娟妍得衷合度要皆不失為名家也

五言排律
顧亭林
五言絕

七言絕
袁凱
徐禎卿
李樊談
孫善
字仲衡

七言絕文成青邱志道孟載劉子高張來儀劉仲修王安中並有唐人風度而海叟神味雋永衍自然明秀尤為本色當行西涯大復朗朗有致昌穀學王龍標滄溟學李太白格高韻絕成臻極境徐惟和兄弟曹忠節程孟陽王介人范東生謝在杭林初文諸人措詞婉雅綽有餘妍斯可與劉賓客鄭都官把臂入林耳

明三才詩選 凡例

四

嘗謂詩不可不清而尤不可不真清者詩之神也王孟章柳如幽泉曲澗飛瀑寒潭其神清矣李杜韓蘇如長江大河魚龍百變其神亦未嘗不清也若神不能清徒事抹月批風枯淡閒寂則假王孟而已真者詩之骨也詩以詞為膚以意為骨康樂跡跡故其詩豪邁元亮高逸故其詩沖

澹少陵崎嶇戎馬故其詩沉鬱青蓮嚮慕仙靈故其詩超曠後人讀之想見其人性情出處所以為真詩若乃生休明之世而無病呻吟處衡泌之間而恣談國是則偽少陵而已茲集所收雖面目不一要皆無悖於清真二字優孟門戶之習吾知免夫

宋姜白石詩說有云一家之語自有一家之風味如樂之二十四調各有韻聲乃是歸宿處模仿者語雖似之韻已無矣雞林其可欺哉又居易錄載王茂京與漁洋論畫於南唐推董源於宋推巨然於元推倪黃於明推董文敏謂諸家看是古澹閒遠而中寔沉着痛快惟解人知之漁洋以為其說可通於詩此二則皆有至理深味茲選去取亦

竊附此義焉

詩有夙負盛名而寔不能成家者如汪朝宗廣洋詩撰語

鬆利多流淺率靜志居詩話載其佳句數十聯要亦平平

且其人以依違胡惟庸獲罪本非正人更不足取若鄭少

谷善夫以學杜自命拙直枯悴不免詩囚之目王稚欽廷

陳猖狂邪僻何異桑悅詩亦贗鼎之流母足娛玩朱升之

應登雲霄規撫空同鈍澁尤甚王履吉寵王道思

慎中襲顏光祿之貌板重不靈宗子相臣慕太白之風尚

未得其形似無論神理蔣子雲山卿楊夢山巍李伯遠應

徵朱兆隆國祚師法古澹氣格亦完而殊渺合作屠長卿

隆勳則明臣王承父叔承篇什最富而沙礫盈前無金

可揀雖多亦奚以為他如湯臨川顯祖徐文長渭王百穀

穉登排斥七子之非皆有特識惟臨川以詞曲名家詩傷

牽率徐既失之粗野王又病于纖穠何其明于繩人而昧

于鏡己也至祝允明唐寅之俚俗王彥泐馮班之淫艷三

袁宗道宏道中道之佻仄鍾惺譚元春之幽詭則人所共知毋庸

深論凡此諸家大抵不出偽俳二體偽體足以惑學人俳

體易於動流俗其弊均也茲選槩從芟薙庶幾無戾雅音

永樂至成化時之詩三楊解胡首倡臺閣體如塵羹土飯

望而生憎蘇秉衡平劉欽謨昌等競為香奩體則又搔頭

弄姿極盡媮態詩道至此寔一大厄斯由孝陵長陵酷忌

文士殺戮太甚大傷天和以致百餘年間風雅淪喪讀書

種子從此斷絕道衍此言不可謂非先見也中間惟郭定

襄劉孟熙二人氣骨稜稜差強人意今以附程節愍後焉

程節愍陳忠裕曹忠節夏節愍鄭湛若皆前明忠義之士

詩亦專門名家亟登正選以光斯集至如孫忠愍炎王忠

文禱方忠文孝孺練忠肅子寧于忠肅王文成楊忠愍繼

盛高忠憲攀龍倪文貞元璐盧忠肅象昇史忠正可法左

忠貞懋第劉忠介宗周黃忠端道周瞿忠宣式耜黃忠節

高耀吳節愍易陳忠簡子壯陳忠烈邦彥湯忠節廷麟顧

節愍咸正梁節愍朝鍾諸公浩然正氣本不以篇翰爭長

將另錄一集以申仰止之意茲集不更入選

明人有全集無稱而一篇獨絕者如王子宣宮詞駱用卿

淮陰廟王季木項王廟戴南枝嚴陵釣臺之屬以及方外
閩秀幽隱散佚之什佳者不少另有續編明詩選拾遺以
補闕畧茲集亦不備載

道光元年歲在辛巳元旦錢塘汪端識

明三十家詩選初集目錄

卷一 六十一首

劉基 九十四首

附錄

宋四訥 八首 詹同 十首

胡翰 六首 梁寅 九首

卷二

高啟 一百七十五首

卷三上

李東陽 六十七首

附錄

楊一清 六首 邵寶 九首

楊慎 十四首

卷三下

李夢陽 四十首

附錄

尹耕 五首

卷四

何景明 一百二十五首

卷五上

徐禎卿 六十一首

附錄

沈周 九首 孫一元 十五首

卷五下

謝榛 六十八首

卷六上

李攀龍 四十六首

附錄

于慎行 六首

卷六下

王世貞 五十七首

附錄

吳國倫 五首 梁有譽 十二首

歐大任 十一首 黎民表 五首

王世懋 五首

卷七上

陳子龍 六十首

卷七下

顧炎武 四十四首

附錄

韓洽 十三首 沈欽圻 九首

邢昉 十二首

卷八上

陸世儀 六十四首

附錄

陳瑚 十首 杜濬 二十八首

徐夜 五首

卷八下

陳元孝 四十四首

明詩選初集止此計八卷 共正選十三家附錄二十

二人

明三十家詩選參閱姓氏

業師仁和高邁菴先生 樹程

婁東蕭樊邨先生 掄

金匱楊蓉裳 芳燦

大興舒鐵雲 位

秀水王仲瞿 良士

鎮洋彭甘亭 兆蓀

華亭姚春木 椿

仁和錢叔美 杜

外伯祖錢塘梁山舟先生 同書

姨丈德清許周生先生 宗彥

舅氏錢塘梁曜北先生 玉繩

世父春園公 璐

伯兄問樵 初

仲兄舊士 潭

明三十家詩選初集卷一

錢塘 汪端 允莊輯

劉基九十四首

基字伯温青田人元至順癸酉進士至正中為行樞
密院經歷與石末宜孫守處州方氏之亂安集本郡
為執政者所嫉置公軍功不錄遂棄官歸隱青田山
中著郁離子以寓志時義兵從之甚眾客有說公據
全越畫江而守者公曰吾嘗憤方國珍張士誠等所
為今用子計與彼何殊耶且天命將有歸子姑待焉
會太祖定括蒼聞公名遣總制官孫炎聘之遂由間
道詣金陵歷官至御史中丞洪武初論佐命功封誠



意伯四年賜歸老鄉里初上欲相胡惟庸以問公公謂不可及惟庸掌中書省事挾舊忿以談洋事奏訐之公不獲已復入朝居京數年有疾惟庸以醫來視飲其藥中毒增劇帝自製詔書賜之遣使送歸青田抵家一月而卒洪武八年也年六十五後惟庸謀逆伏誅帝思公先見召其孫薦襲爵正德中追諡文成公詩文曰覆瓿集元季之作也曰犁眉公集明初之作也又有寫情集春秋明經共二十卷

虞伯生曰伯溫詩發感慨於性情之正存憂忠於敦厚之言是不可及若其體製音節無愧盛唐

李時勉曰公之出處進退比之子房明白正大偉然

大丈夫之所爲公之詩文其氣壯故其辭雄渾而敦厚其學博故其辭深宏而奧密其志忠故其辭感激而切直其行廉故其辭蠲潔而清勁古今之能以勲業文章並顯於當時而垂耀於後世若公者幾人哉姚福曰青田劉公潛溪宋公皆雄材博雅宋公旣出當制作之任故其文篇富贍劉公在元末幽憂悲憤一寓於詩出且以謀畧稱故所作無幾今觀郁離子廣引曲喻雄辨不可當非宋公龍門子所及也然其言則積年精思之所到而龍門子則以八十八日而成此其所以優劣歟

鍾廣漢曰文成論詩謂今天下爲詩者取則於達官

貴人而不師古此語深中元人之病試讀公集中詩皆有古人之一體可謂善於師古者也

陸道威曰詩家能合興觀羣怨者雖人有數首然求其全部大旨俱合者離騷而後惟陶淵明杜子美在明則劉文成皆由其立心正也作詩者不可不讀又曰文成詩無一語風雲月露但憂時閔世之言極得古人詩言志之旨樂府尤妙可謂杜陵以後一人又曰文成古文似勝宋景濂能見大意不詭隨時俗爲浮屠文皆有分寸此大家正派也又曰文成以功名掩其學術然子謂伊呂當是時亦不過如此聖賢學問原主於行道救民非必沾沾講貫而後謂之儒者

也今人但知以天文術數推文成而不知其事事皆合於儒

朱錫鬯曰孫伯融炎在處時明祖命招致伯溫伯溫堅不肯出以寶劍遺伯融伯融作詩以爲劍當獻天子封還之伯溫無以荅乃逡巡就見而李時遠詩統謂此劍伯融家藏作歌以贈劉者誤也

沈確士曰元季詩皆尚辭華文成獨標高格時欲追逐杜韓故超然獨勝允爲一代之冠

澄懷居士曰世嘗以劉文成負命世之才爲王者之佐足與子房伯仲而晚節不能從赤松以游卒爲胡惟庸所中頗致疑焉余讀其全集考其時事然後嘆

文成之爲純臣而深悲之也夫明祖雄猜多忌甚於漢高何則漢高忌武臣不忌文臣以爲不握兵柄無能爲也韓彭以梟悍見誅而曲逆隨陸之徒並以功名終蒯徹魯兩生雖不附己亦能容之于房文臣也故請封留以明志託辟穀以遺榮而卽能免禍若明祖則不然當夫元綱不振羣雄兢亂起徒步以有四海疆場帷幄實藉諸臣之力天下旣定務翦除勝己以弭後憂故文武諸臣均不能無忌焉開平寧河幸而早世賢如中山尚有舊邸之試御膳之疑親如岐陽亦不免譴責憂死他若馮勝傅友德廖永忠王弼輩以武功著宋濂魏觀陶凱許存仁輩以儒學重諫

臣則葉伯巨茹太素李仕魯等循吏則方克勤黃哲道同等文士則王彝張孟兼王行等詩人則高啟孫蕢張羽等皆以猜忌之故不得其死矧文成才兼文武先幾遠燭聲望駕軼諸人上則謀所以除之者必有甚於諸人也而文成嘗力辭公爵曰陛下天授臣何敢貪天之功則未嘗不明知止之道也洪武四年請歸老鄉里日惟弈棋飲酒口不言朝事則未嘗昧於進退之幾也初以談洋地爲鹽盜藪方氏之所由亂請設巡檢司守之意在衛民除害無他及茗洋逃軍反吏匿不以聞文成令長子璉奏其事不先具白中書省胡惟庸方掌省事挾前隙使吏訐之謂談

洋地有王氣圖爲墓民弗與則請立巡檢逐民明祖頗爲所動遂奪文成祿夫明祖英主豈不能察奸人之誣良以積猜甚深有觸卽發耳當是時文成不入朝謝過請留京師則族且赤矣觀其旅興詩有云微福非所希避禍敢不慎松柏盡樞翳桃李更何言勞生邁六極老病在羈旅身世且未保況敢言功勲人生多憂患死去百慮消但恨不得無由脫鞶鑣鬱陶感憤蓋自知必不獲免矣且夫文成豈畏死者哉第恐非罪見誅則明祖藏弓之忍必致貽譏史冊故假手惟庸之毒以遂全歸大臣毋辱此卽蕭傅和藥之意也考其仲子璟恩遇錄載惟庸伏誅後明祖數

召見璟燕語如家人深惜文成忠而受禍證之臨歿誠子之語不可謂非前知且以儒術導君其言粹然一出於正鈞奇用譎旣勝子房而子璟死靖難之變以視辟疆請王諸呂墮其家聲尤有賢不肖之別嗚呼全已之名而不忍彰君之過其跡甚晦其心彌苦卒之沉寃大白善著貽謀純臣心事較石碣猶當過之又豈子房所可同日語哉顧後人未有表揭之者爰爲詳論之如此

汪端論曰文成樂府借古題以詠時事忠愛纏綿長於諷諭有一唱三歎之音五古清蒼深厚不屑摹古自然雅正七古滔滔莽莽若不經意至二鬼一篇亦

離騷寓言之旨而世務險怪奔放者往往藉口於此故既錄而仍置之此外所收亦從畧五七言律及絕句悲涼激越寄託遙深足以希風少陵歸思謂七律爲最下非篤論也合諸體觀之奇警清壯隊仗工整似少遜元遺山而其渾雄流轉無枝詞浮響則又過之余嘗謂文成詩境獨到處在沉鬱二字唐以後詩家可當此二字者正惟遺山及文成兩人耳夫以文成之學力固不專以奇肆見長而亦未嘗如李空同輩侈然以復古自命自來諸選家或賞其才氣奇肆或表其復古之功皆非真知文成者若王鳳洲謂文成如劉宋好武諸王見王謝子弟不免低眉此尤門

戶之見宜鳳洲晚年亦自深悔之也

楚妃歎

江漢揚波六千里。上有巫山蠱天起。錦衾一夕夢行雲。萬戶千門冷如水。聞道秦兵下武關。君王留連猶未還。山深不見章華路。汨羅冤淚空潺湲。尙憶前王好馳逐。宮中美人不食肉。回狂作哲。須臾間。至今相業歸孫叔。楚宮無復如昔人。況有神女如花新。悲來恨新。還憶故誰能斷。却巫山路。虞山云。公此詩蓋感元順帝寵高麗奇后專權亂政之事而作。

夜夜曲

冬夜恒苦長。夏夜恒苦短。短長相蔽虧。殷勤望推挽。紉茅作繩繩。易斷汲水作池池。易旱故鏡塵昏。難照遠故衣絮。

敝無新暖。西風嫋嫋吹桂枝。白露點蒼苔。黃葉滿。哀音古節

望行人

朝聽乾鵲鳴。暮見燈花結。鵲鳴燈結無定期。鏡裏青雲看
成雪。人生百歲難長保。天上孤鸞海中老。滔滔逝水不回
西。灼灼秋花幾時好。一朝復一朝。一夕復一夕。只恐君心
念妾時。妾身已作山頭石。低徊慘淡而無怨。誹之意此真風雅。

走馬引

天冥冥。雲濛濛。當天白日中。貫虹。壯士拔劍出門去。手提
仇頭擲草中。擲草中。血漉漉。追兵夜至深谷伏。精誠感天
天心哀。太一乃遣天馬從天來。揮霍雷電揚風埃。壯士呼
天馬馳。橫行白晝。吏不敢窺。戴天之心。自古有。必報天地

亦與相扶持。夫差徒能不忘而報。越棲於會稽。又縱之始
知壯士獨無媿。魯莊何以爲人爲。虞山云元明宗被弑於
見忽察順帝即位七年
乃以尚書之言撤文宗主於太廟而詔書但以私圖
傳子爲言昧於春秋復仇之大義矣此詩蓋深譏之

梁甫吟

誰謂秋月明。蔽之不必一尺翳。誰謂江水清。淆之不必一
斗泥。人情且暮有翻覆。平地倏忽成山谿。君不見桓公相
仲父。豎刁終亂齊。秦穆信逢孫。遂違百里奚。赤符天子明
見萬里外。乃以薏苡爲文犀。停婚仆碑何震怒。青天白日
生虹蜺。明良際會有如此。而况童角不辨粟與稗。外間皇
父中豔妻。馬角突兀連牝雞。以聰爲聾。狂作聖。顛倒衣裳
行蒺藜。屈原懷沙子。胥棄魑魅叫嘯風。凄凄梁甫吟。悲以

悽岐山竹實日稀少鳳皇憔悴將安棲沈確士云拉雜成文極煩冤贖亂之

牆上難為趨行

致此離騷遺音也
弱水不可以航石林不可以車人生貴守分牆上難為趨茫茫入極內狹徑交通衢紛紛皆轍跡擾擾論錙銖焦原詫齊踵龍領夸探珠片言取卿相杯酒興翦屠機事一朝露妻子化為魚林間有一士蓬蒿窮窮廬種稻十數畝種桑八九株有酒且飲之無事即安居孰知五鼎食聊保百年軀悠悠身後事汲汲復何如

隔谷歌

鼓咽悲風弓折不可把弟兄隔谷不相聞咫尺人間與泉下
丈夫誓許國殺身非所憐兩心本一氣何能坐相捐登埠四顧望慨慷肝膽裂不見救兵來但見繞城鐵甲光如雪飛禽在羅網尙或念其飢身為高官馬食粟忍見手足居重圍相彼鴻與雁亦各顧匹儔挽弓射一猿羣猿拔箭聲啾啾鳥獸且有情人心獨何尤嗚呼田家紫荊雖微木不忍聽君歌隔谷有益於人偷風教之作可與太白上留田並傳

懊儂歌

白鷓鴣養雛時夜夜啼達曙如何羽翼成各自東西去沈確士云其法本之打起黃鶯兒篇

玉階怨

長門燈下淚滴作玉階苔年年傍春雨一上苑牆來沈確士云

月三

明三才詩選卷一
婉而

長門怨

白露下玉除。風清月如練。坐看池上螢。飛入昭陽殿。宗子相云
不作怨語
怨已自深

蕤露歌

人生無百歲。百歲復如何。古來英雄士。各已歸山阿。鍾廣漢云
音韻悲涼初讀之
嗚咽再讀之慷慨

秋思

蕙草芳已歇。候蟲寒不鳴。相知惟白髮。日夜滿頭生。
露下階苔光。風生庭樹冷。推窗掩明月。不忍見孤影。

築城詞

君不見杭州無城賊直入。台州有城賊不入。重門擊柝古來而。況四郊多警急。愚民莫可與慮始。見說築城俱不喜。一朝城成不可踰。挈家却向城中居。寄語築城人。城高固自好。更須足食仍足兵。不然劍閣潼關且難保。獨不念至元延祐年。天下無城亦無盜。

畦桑詞

編竹為籬更栽刺。高門大寫畦桑字。縣官要備六事忙。村村巷巷催畦桑。畦桑有增不可減。準備上司來計點。新官下馬舊官行。牌上却改新官名。君不見古人樹桑在墻下。五十衣帛無凍者。今日路傍桑滿畦。茅屋苦寒中夜啼。

東飛伯勞歌

月三才詩選卷一

南飛鷓鴣北飛鵠。黃昏鳴雞白日燭。珊瑚石上栽兔絲。鴛鴦獨宿枯桑枝。永夜涼蟾入羅幕。蟬翼不如秋鬢薄。寒塘露蓮千葉紅。可憐零落空隨風。此詩感悼失時之意

鳴雁行

離離鳴雁鳴達旦。舉翼相連拂雲漢。平原漠漠生野烟。雁飛只向江南天。江南十月多禾黍。一半輸官半供汝。明年二月歸。養雛雛成又望江南去。澄懷云此詩似刺元季督運者

班婕妤

昭陽秋清月如練。笙歌嘈嘈夜開宴。長信宮中辭輦人。獨倚西風詠紈扇。傾城自古有。褒姒紅顏失寵何。須怨泠泠玉漏掩。重門一點金釘照書卷。寫出班姬之品非尋常宮怨可比

蓮塘曲

落日下蓮塘。輕舟赴晚涼。偶然花片落。飛出兩鴛鴦。俊逸

琅琊王歌

駿馬須好鞍。強弓須勁箭。將軍不知兵。健兒空自健。樂府本色

長歌續短歌

短歌調促情苦悲。長歌引愁無絕期。短聲欲盡長聲續。似是荆山人泣玉。悲哉荆山泣玉人。但知貴玉不貴身。縱令哭盡歌堪聽。何異春花委路塵。古稱悲歌可當哭。傷心如中金石鏃。更不必聽蔡女箏。又不必聽漸離筑。長歌飄揚徹九天。短歌嗚咽入九泉。徒言歌哭兩情異。誰知歌聲尤可憐。陸道威云文成雖嘗事元復事明。然其意寔以救民為主。非愛功名也。此詩具見文成一生心事。于詩

明三才詩選卷一
十一
鑑論斷中
頗發明之

發安仁驛

雞鳴發山驛。天黑路彌險。煙樹出。猿聲風枝落。螢點江秋氣轉炎。嶂濕雲難斂。佇立山雨來。客愁紛冉冉。

望武夷山作

飲馬九曲溪。遙望武夷峰。長林抱迴合。丹崖造空濛。浮暉澹寒翠。水木皆曼容。薄遊限塵務。促景尼奇蹤。緬懷紫陽子。千載誰與同。瓊佩邈煙霧。石函閔遺封。羈猿怨幽澗。飛蘿冒芳叢。瑤琴空流泉。桂枝徒秋風。悵望佳期阻。纏綿絲髮思。重殷勤尺素書。願寄雲間鴻。出入 騷雅

早發建寧至興田驛

雞鳴戒晨裝。上馬見初日。露滋葉尚俯。霧重山未出。客途得霽景。緩步非縱佚。矧茲歲有秋。高下俱穎栗。牛羊散原野。鵝鴨滿阡陌。懷抱旣夷曠。神情自清謐。寒花蔓籬落。候蟲響蒙密。霞標青楓林。雪綻烏柏實。幽覽雖云遽。作趣領已悉。我行固無期。況乃塵事畢。

送田生歸鄉

少年客他鄉。還鄉反如客。莫驚新井里。乃是舊阡陌。歡笑集姻親。觴酌上斑白。老翁愛英俊。慰問至日夕。應憐鄰舍兒。魚龍兩縣隔。

題朱孟章虞學士送別圖後

秋郊一杯酒。握手念將離。落日照野水。涼風生樹枝。今朝

重相憶。青山如舊時。鬢毛非松柏。爭得不成絲。沉警似篋中集詩

壬辰歲八月自台州之永嘉度嶺

昨暮辭赤城。今朝度蒼嶺。山峻路屈盤。峽束迷晷景。豁出風門坎。窅入天井冥。行九地底高。瞰羣木頂。瀑泉流其中。微若洩溟滓。哀猿嘯無外。去鳥飛更永。僕夫怨跋涉。瘦馬悲項領。盜賊追天誅。平人遘灾眚。佇立盼嶽岑。心亂難為整。能寫難狀之景

夢草堂遺懷

卽事在自得。彊歌非正音。所以春草句。聲價重兼金。若人千載下。遺響邈難尋。淒涼一池塘。賴爾得至今。我來當杪秋。天淨潢潦沉。枯荷有餘馨。衰柳無殘陰。鼓鼙響未已。山

水意徒深。感時念兄弟。惻愴傷我心。起二句千古文章妙訣不外乎此

別峯和尚方丈題唐子華山陰圖

連山走陂陀。大谷入晻曖。屋藏深樹中。路出巨石背。烟雨時有無。澗壑互顯晦。輕盈見飛綃。縹緲沃浮黛。雄梁矯修鼉。壁駿文虯。崢嶸紫霞高。屈曲白水滙。陰森神鬼宅。奮迅龍馬隊。風雲氣象寬。日月光炯碎。借問此何鄉。或有捐余佩。荅云越山陰。信美無與對。自從永和來。燕遊推勝槩。佳人去不還。盛集嗟未再。唐令實好奇。掇拾歸畫繪。上人遠公徒。我亦淵明輩。會晤屬時艱。觀覽增感慨。故園沒灌莽。舉足蛇豕礙。放歌自太息。激烈驚厚載。盤空出險語

琴清堂詩

亭亭嶧陽桐。斷為絳綺琴。絙之朱絲絃。彈我白雪音。虛堂
夜迢迢。華月耿疎林。鳳凰天上來。虬龍水中吟。曲罷起太
息。無人知此心。周青士云神似蘇州

題山水圖

江上何所有。高低千萬峯。結廬覆以茅。取足聊自容。綠樹
既蒼鬱。清溪亦溶溶。地僻無車馬。猿鳥來相從。落日沙際
明。寒烟澹。疎松蒼茫雲霞外。隱見青芙蓉。悠然一舸還。好
景時獨逢。歸來山月出。古刹鳴昏鐘。澹遠

晚同方舟上人登師子巖作

落日下前峯。輕烟生遠林。雲霞媚餘姿。松柏澹清陰。振策
縱幽步。披榛陟層岑。檉花籬上明。莎雞草間吟。涼風自西

來。颯颯吹我襟。榮華能幾時。搖落方自今。逝川無停波。急
絃有哀音。顧瞻望四方。悵焉愁思深。謝茂秦云逸韻
興舉幽思泉發

感時述事

十羊煩九牧。自古貽笑嗤。任賢苟不貳。焉用多。人為師行
仰供給。州縣方告疲。差徭逮所歷。添官有權宜。柰何乘此
勢。爭先植其私。百司並效尤。貨賄縱橫飛。列坐隘公堂。號
令紛披離。名稱到輿隸。混雜無尊卑。正官反差出。道路不
停馳。徇祿積日月。官吏之所希。此輩欲何求。朘剝圖身肥。
世皇一宇宙。四海均惠慈。盜賊乘間發。咎實由官司。胡
未悔禍救。焚用膏脂。姻婭遂連茹。公介棄草茨。農郊日增
壘。良民死無期。天關深虎豹。欲語當因誰。

先王制民產曷分。兵與農三時事。耕稼閱武在嚴冬。亂畧齊憤疾。戰伐厥有庸。那令異編籍。自使殊心胸。坐食不知恩。怙勢含威克。將官用世襲。生長值時雍。豈惟昧韜略。且不習擊剽。悍卒等驕子。有令亦無從。跳踉恣豪橫。鼓氣陵愚蠢。所以喪紀律。安能當賊鋒。崩騰去部曲。蟻合尋歸蹤。時方務姑息。枉法稱寬容。寧知養豺虎。反噬中自鍾。國立制度。恃此爲垣墉。積弊有根源。終成腸肺癰。何由復古道。一視均堯卦。

豢狗不噬禦。星馳募民兵。民兵盡烏合。何以壯干城。百姓雖云庶。教養素無行。譬彼原上草。自死還自生。安知徇大義。捐命爲父兄。利財來應召。早懷逃竄情。出門卽剽掠。所過沸如羹。總戎無節制。顛倒迷章程。威權付便嬖。賞罰昧公平。飢寒莫與恤。銳挫怨乃萌。見賊不須多。奔潰土瓦傾。旌旗委曲野。鳥雀噪空營。將軍與左右。相顧目但瞠。此事已習慣。智巧莫能爭。廟堂忽遠算。胸次猜疑并。豈乏計策士。用之非至誠。德威兩不立。何以御羣氓。慷慨思古人。惻愴淚沾纓。

虞刑論小故。夏誓殄渠魁。好生雖大德。縱惡非聖裁。官吏逞貪婪。樹怨結禍胎。法當究其源。剪鋤去根芽。蒙龍曲全宥。駕患於後來。濫觴不埤塞。滔天谷陵頽。總戎用高官。沐猴戴母顛。玉帳饌酒肉。士卒食菜羹。未戰已離心。望風遂崩摧。招安乃倡議。和者聲如雷。天高豹關遠。日月照不該。

俱曰賊有神。討之則蒙災。大臣恐及已。相視若銜枚。阿諛就姑息。華紱被死灰。姦宄爭效尤。無風自揚埃。嘯聚逞強力。謂是爵祿媒。黎民亦何辜。骨肉散草萊。傾家事守禦。反以結嫌猜。慟哭浮雲黑。悲風為徘徊。赤子母不憐。不如絕其胚。養梟逐鳳凰。此事天所哀。胡為尚靡定。顛倒陛與頽。春秋戒肆眚。念此良悠哉。

秦皇縣九宇。三代法乃變。漢祖都咸陽。一統制荒甸。英雄既鏖削。瘡痍權休宴。文皇繼鴻業。垂拱未央殿。累歲減田租。頻年賜縑絹。太倉積陳紅。園府朽貫線。是時江南粟。未盡輸赤縣。方今貢賦區。兩際日月窳。胡為倚東吳。轉餉給豐膳。徑危冒不測。勢與蛟龍戰。遂令鯨與鯢。掉尾乘利便。

扼吭要國寵。金紫被下賤。忠良怒切齒。姦宄競攀援。包羞屈政典。尾大不可轉。聖人別九州。田賦揚為殿。中原一何臙。所務非所先。幽風重稼穡。王業邱山奠。夫征厲未習。孰敢事游燕。哀哉罔稽古。生齒徒蕃羨。一耕而十食。何以奉征繕。長歌寄愁思。涕淚如流霰。程孟陽云感時諸詩可謂詩史追配杜老邁元白矣

秋夜感懷柬石末公申之

不寐知夜長。起視天宇濶。散漫草上風。朦朧雲間月。寒禽鳴疎樹。黃葉墮階闥。俛仰觀羣物。惆悵不敢發。誰云螻螳壤。能使泰山夙。蒼鷹鍛六翮。狡兔營三窟。何當威弧正。王旅得肆伐。箇籥雖微材。尚可施羽箚。豈意風浪舟。心猶隔胡越。士生非金玉。有足難自達。周嫠不恤緯。楚放常懷闕。

平生葵藿情。忍與霜露歇。玄冰膠坤軸。非君孰能幹。申章匪繁辭。悲憤不可遏。

有感

勾芒發陳根。北斗轉東柄。衆星各參差。威弧何時正。好生雖聖心。明刑亦王政。哲人慎謀始。斯焉獲終慶。徒言兩階舞。可以懷逆命。不見三危山。萬里竄梟獍。世德異唐虞。民情好爭競。那無跗扁醫。而有膏肓病。波濤地軸就。虎豹天關負。雨露當春滋。風霜及秋勁。誰能奉明王。順天行號令。
澄懷云元季紀綱紊弛刑賞不明故文成痛切言之也

偶興

勞人怨長途。壯士悲老別。那將望鄉心。對此傷神月。淒涼

寒風至。惆悵芳草歇。瑤琴無子期。絲弦為君絕。似孟東野

晨詣祥符寺

上馬雞始鳴。入寺鐘未歇。草際起微風。林端澹斜月。僧房湛幽寂。假寐待明發。松徑靜無人。經聲在清樾。

在永嘉作

高屋集飛雨。蕭條生早寒。我來復幾時。明月缺又團。浮雲蔽青天。山川杳漫漫。狐狸嘯悲風。鯨鯢噴重瀾。孤雁號南飛。音聲淒以酸。顧瞻望桑梓。慷慨起長歎。願欲凌風翔。惜哉無羽翰。中夜百感生。展轉不遑安。枯荷響西池。槁葉鳴林端。寥寥天宇空。冉冉時節闌。舉俗愛文身。誰識章甫冠。河流未到海。平陸皆驚湍。旗幟滿山澤。嗚呼行路難。

旅興

微福非所希。避禍敢不慎。富貴實禍樞。寡欲白鮮客。蔬食
可以飽。肥甘乃鋒刃。探珠入龍堂。生死在一瞬。何如坐蓬
華。默默觀大運。澄懷云旅興及雜詩應是公遭胡惟庸譏問時作

窮巷屏人跡。開門見青山。青山似故鄉。客子何當還。蟋蟀
日夜鳴。綠樹亦已殷。白日駛西征。浮雲不可攀。安得生羽
翼。奮飛出元關。

雨來羣山暗。雨過羣山明。山明猿鳥喜。山暗猿鳥驚。歲暮
陰風起。白日西南傾。寒蟬枝上號。夏蟲草間鳴。人生非草
木。能無感中情。

倦鳥冀安巢。風林無靜柯。路長羽翼短。日暮當如何。登高
望四方。但見山與河。寧知天上雨。去為滄海波。慷慨對長
風。坐感元髮皤。弱水不可航。層城岌嵒峩。淒涼華表鶴。太
息成悲歌。妙處不讓阮公詠懷

青青瀟湘竹。猗猗被寒水。遊子如飛蓬。佳人曠千里。登高
左右望。但見黃塵起。鳳凰翔不下。梧桐化為枳。傷懷不可
道。憂念何時已。

烏鳴朝啞啞。鵲鳴暮啾啾。聞鵲既不喜。聞烏復何憂。世人
務苟得。君子絕外求。滄浪迅風波。無風即安流。胡為自冰
炭。以貽達者羞。

寒燈耿幽幕。蟲鳴清夜闌。起行望青天。明月在雲端。美人
隔千里。山河杳漫漫。元雲翳崇岡。白露凋芳蘭。願以綠綺

琴寫作行路難。憂來無和聲。絃絕空長歎。

秋山青如烟。秋月白如水。登高俯空曠。咫尺見千里。悠悠孤雲行。嫋嫋涼風起。涼風吹客衣。客心隨風飛。願作滄海潮。朝來暮還歸。

日落天氣涼。逍遙步庭墀。蟋蟀已在宇。鴻雁來何遲。少壯輕遠遊。衰老傷別離。念我親與友。各在天一涯。音容兩契濶。悲歡絕相知。鍛羽懷舊林。戢鱗思故池。百年能幾何。逝者無還期。俛仰增感歎。有懷當語誰。殷勤託宵夢。聊用慰所思。

久旱草不生。一雨青滿地。新黃與舊枿。好醜各自媚。啾啾黃鶯吟。習習元鳥至。閒庭人跡稀。白日澹清氣。平生孟公綽。庶足無妄覲。但願長若斯。撥置身外事。

雜詩

服力徇穡事。矻矻望有秋。凌晨荷鋤出。日入且未休。中夜看星辰。早潦切所憂。西成告豐歲。珠璣滿田疇。飽食幸可期。喜色欲盈眸。寧知霜雪早。零落不得收。荒畦委滯穗。槿籬掛空篝。斜陽照白髮。短褐還飯牛。天命固如此。汲汲復何求。

夏夜台州城中作

江上火雲蒸熱風。欲雨不雨天夢夢。良田半作龜兆拆。稅稻日夕成蒿蓬。去年海賊殺元帥。黎民星散劫火紅。耕牛剝皮作戰具。鋤犁化盡刀劍鋒。農夫有田不得種。白日慘

澹衡茅空。將軍虎毛深。玉帳野哭不入。轅門中健兒鬪死。
烏自食何人幕。下矜奇功。今年大軍蕩淮甸。分命上宰麾
元戎。舞干再見有苗格。山川鬼神當効忠。胡爲旱魃還肆
虐。坐令毒沴傷和沖。傳聞逆黨尙攻剽。所過邱壠皆成童。
閩司恐畏破和議。斥埃悉罷雲邊烽。殺降其說有大禁。無
人更敢彎弧弓。山中悲啼海中笑。蜃氣繞日生長虹。古時
東海辟孝婦。草木枯瘁連三冬。六月降霜良有以。天公未
必長嗜聾。只今幅員廣無外。東至日出西太蒙。一民一物
吾肺腑。仁者自是哀癯恫。養梟殛鳳天所厭。誰能抗疏回
宸衷。夜涼木末掛河漢。海嶠月出光玲瓏。仰視皇天轉北
斗。嗚呼愁歎何時終。澄懷按元末方國珍兄弟倡亂海上
有司憚於用兵一意招撫公以國珍

首逆且數降數叛請斬之朝議不聽此
詩憤國珍之剽掠譏執政之無人也

題松下道士攜琴圖

道士抱琴松下行。松風入耳清涼生。石梁苔滑不可上。潭
水泠泠學琴響。琴有意兮水無心。水中有龍能聽琴。琴聲
淒斷水流咽。月滿空山落松雪。

寄宋景濂

我思美人乃在仙華之山。山前夜半掛河漢。天津兩旗俯
可攀。我欲從之阻河關。初平不來白羊死。瘦骨蝕盡莓苔
頑。風沙蕭蕭隔人間。元霜日夕凋玉顏。有鳥有鳥丁令威。
側身下上空孤飛。女媧石墜鰲脚折。海水散作雲霏霏。山
中有奇樹一華。一千秋。美人何不折。寄我使我歎恨長。疑

眸深沉洞谷山鬼集陰氣六月冰霜留嗟哉美人誰與儔
明年定約赤松子與爾羣峰頂上遊骨氣嶽崑似少陵寄韓諫議詩

為祝彥中題山水圖

高軒玲瓏不受暑半幅輕綃宿烟雨文窗素壁生空明似
聞水聲繞庭宇松髯拂天藤蔓垂枯根瘦石相因依寒濤
不驚虎兒臥嵐翠欲與蛟虬飛空江悠悠一漁艇水白沙
明萬魚靜武陵桃花何處尋落日微風片帆影學杜入神結尤深秀

題陳彥德畫

君不見昔者米南宮又不見今時趙學士能將翰墨爭鬼
工天下流傳名父子括蒼處士身姓陳小郎英俊尤可人
欲收大地入掌握筆意所到如有神曉攜小幅來贈我紅

日滿窗花婀娜開軒展視心眼寬如在岳陽樓上坐湖波
吹烟入遠山君山乃在湖中間蒼梧九疑隔湘浦孤雲日
斷幽篁斑漁舟一葉來何處巫峽雨昏啼鳩暮澤畔行人
久不歸沙上輕鷗自飛去陳公子聽我歌深林大谷龍蛇
多蓬萊三鳥可避世欲往其柰風濤何朱笠亭云一往清駛錚錚拔俗

題太公釣渭圖

璇室羣酣夜璜溪獨釣時浮雲看富貴流水澹鬚眉偶應
非熊兆尊為帝者師軒裳如固有千載起人思沈確士云通首格高

隱然有王佐氣象

丙戌歲將赴京師途中送徐明德歸鎮江

疲馬懷空櫪征衣怯路塵那堪遠遊子復送欲歸人月滿

西津夜花明北固春。論文應有日。話別莫悲辛。

不寐

不寐。月當戶起。行風滿天。山河青靄裏。刁斗白雲邊。避世慙商綺。匡時愧魯連。徘徊懷往事。惻愴感衰年。

望孤山作

曉日千山赤。寒烟一島青。鞦韆心霜下。草生態水中。萍黃屋迷襄野蒼。梧隔洞庭空。將垂老淚。灑恨到滄溟。五律純是老杜法脈

古戍

古戍連山火。新城殷地笳。九州猶虎豹。四海未桑麻。天迥雲垂草。江空雪覆沙。野梅燒不盡。時見兩三花。

有感

殺氣乾坤黑。陰氛日月黃。已成心曲亂。不復鬢毛蒼。夜哭城笳裏。朝烟野戍傍。扶傾無郭李。何地尚耕桑。

次韻追和音上人

絕頂浮雲鎖石關。曲途危磴阻躋攀。他年甲楯孤臣泣。此日齋鐘老衲閒。夜永星河低半樹。天清猿鶴響空山。干戈未定歸無處。擬結茅廬積翠間。

會稽

會稽南鎮夏王封。蔽日騰空紫翠重。陰洞煙雲輝草木。古祠風雨出蛟龍。元夷此日歸何處。玉簡他年豈再逢。安得普天休戰伐。不令竹箭困輸供。真杜詩

仍用韻酬衍上人

多愁祇覺世情疎。愁極憑誰與破除。江海煙塵羈客淚。雲山桑梓別人居。高風斷雁惟將恨。衰草殘螢不照書。世亂弓刀方有用。休誇新句逼黃初。

感興

二月江南雪片飛。吳山寒色動征衣。莫尋花徑防泥滑。且掩衡門待日晞。弱柳先舒應自損。蟄蟲已出更安歸。乾坤處處旌旗滿。肉食何人問采薇。中二聯有安命待時之意不徒寫景

丙申歲十月還鄉作

故園梅蕊依時發。吳縣歸人見却悲。花自別來難獨立。人今老去復何之。未能荷鍤除叢棘。且可隨方着短籬。等待薰風暄暖後。枝間看取實離離。用意與前首同

贈西岩道元和尚

西岩寺裏雲巢子。不到人間幾十年。杖錫野猿迎路側。談經山鬼拜燈前。塵飛劫火青春夢。雪滿長松白日眠。近得淵明入蓮社。興來時復有詩篇。奇峭而非險詭

次李子庚韻

風落餘花春事非。愁心煙雨共霏霏。溪雲不作從龍起。山石何須學燕飛。籬下舊存彭澤菊。林間新長首陽薇。夜闌忽漫聞啼鳥。腸斷天涯信使稀。

聞猿有感

猿響秋山夜。向闌白雲如。雪擁林端。鍾儀楚奏難成調。蔡女胡笳欲罷彈。澤畔離騷餘怨恨。巴東涕淚想洑瀾。唯應

華表歸來鶴。明月清風共歲寒。

漫成

愁將短髮逢搖落。漫把殘燈照寂寥。兩地身心悲夜鶻。五更鐘鼓夢春潮。驚寒柏葉垂垂靜。向日霜華泣泣消。悵望煙塵滿歧路。紫芝空長故山苗。

愁感代哭

燕鴻北去又南來。斷壘荒岡幾劫灰。慈母磯寒風落木。望夫石老雨添苔。江流定與天河合。客淚還經地底迴。未必春光便消歇。白華猶發燒殘梅。凄婉欲絕

感興

落日悲風雲滿川。家家閉戶少炊煙。也知渤海無壘遂。漫

憶邯鄲有魯連。三尺青萍思出匣。數莖白髮望歸田。請看如鏡南樓月。此夜清光最可憐。

天弧不解射封狼。戰骨縱橫滿路傍。古戍有狐鳴夜月。高岡無鳳集朝陽。凋戈畫戟空文物。廢井頽垣自雪霜。漫說漢庭思李牧。未聞郎署遣馮唐。放翁遺山有此感慨無此渾厚

次韻和石末公聞海上使命之作因念西州愴然有

感

巫閭析木天空濶。桐柏終南水亂流。邑里蕭條無吠犬。田疇蕪穢少耕牛。萋萋蔓草隨人遠。淡淡殘陽向客留。遲暮飄零偏感舊。幾回垂淚望神州。粗枝大葉老成正自難及

感懷

新晴楊柳散春絲。長路行人有所思。愁上容顏青鏡識。寒
生亭館落花知。高雲送雨來無定。獨鳥驚風去自遲。悶對
庭前紫荆樹。同根那得却相離。

題山水圖爲寶林衍上人作

雨過秋山日欲暝。白雲如雪擁山根。高松沍露和煙冷。迸
水穿沙出谷渾。擬向蘿陰緣石徑。却尋花片入桃源。畫圖
應有通神處。他日相從子細論。浩氣旋折
清而不弱

次嚴上人韻

江水東流西日微。閑身不繫獨何依。塵埃蕭颯枯蓬鬢。霜
露淒涼破衲衣。百粵雨餘山翠合。三韓雲淨海青飛。滄溟
自古通天漢。夢繞黃姑織女機。雄潤

秋夕

柏葉蕭疎柳葉黃。露華如玉綴空廊。丹心欲共燈花結。白
髮偏隨漏水長。月色故園同窈窕。蟲聲此夜獨淒涼。寒鴉
莫更啼金井。衰病能堪幾斷腸。

和衍上人韻

樹頭寒月影扶疎。天上清霜下玉除。紫塞風高鴻失路。碧
梧枝冷鵲移居。虎頭曠日糜倉粟。牛腹中宵詫帛書。見說
抱關堪避世。裨官猶可學虞初。三四喻君子在野
小人竊位之意

卽事

千林搖落暮天寒。短景經檐歲序殘。口舌得官齊虜易。膏
肓致疾上醫難。無根荒蔓風飄急。閱世松喬氣厚蟠。鴻雁

隨陽經遠道。帛書何日到長安。憤世嫉邪之作

秋感

月白天青木葉凋。雲山漫漫故鄉遙。石床墜露珠光動。碧砌幽花玉色銷。十載故人俱土壤。五更歸夢負漁樵。懷來憶往成惆悵。蔓草寒蟲對寂寥。

有感

焚書千古訝嬴秦。避難茫茫走縉紳。尚憶商山近京洛。白頭容得採芝人。澄懷按洪武初詔徵天下山林隱逸之士赴京有司敦道上道不至則罪之既而未竟其用多以細過誅竄殆盡明祖殺戮文士之慘蓋自秦以後開創之主所僅見也公此詩當與葉伯巨奏疏參看

絕句漫興

兔葵燕麥舊人家。曾唱南朝玉樹花。寒暑又隨風日轉。東

陵誰種邵平瓜。

相思舉目萬重雲。燕去鴻來杳不聞。漫說黃金能得士。只今誰是望諸君。

有感

浪動江淮戰血紅。羽書應不達宸聰。紫薇門下逢宣使。新向湖州召畫工。與李後主圍城中填詞相類

送賈思誠

西風嫋嫋水鱗鱗。一曲離歌淚滿巾。殘柳數株鷗數點。夕陽江上送歸人。含思惆悵

和王文明韻

江北江南幾驛亭。可憐疆半草青青。夜涼月白西湖水。坐

看三台上將星。

次韻和石末公見寄

漢殿千門錦繡開。不堪一夜柏梁災。魯般骨朽蕭何死。腸斷無人為取材。

越溪清水淬干將。鬼魅驚啼畏夜光。不共鉛刀爭利鈍。何妨玉匣且深藏。

過蘇州

姑蘇臺下垂楊柳。曾為張王護禁城。今日澹煙芳草裏。暮蟬猶作管絃聲。

送鮑生之閩中

青青芳草夾長隄。漠漠輕煙送馬蹄。他日相思建溪上。棠

梨花發鷓鴣啼。

附錄

宋

訥八首

訥字仲敏滑縣人性持重學問該博元至正中舉進士任鹽山尹棄官歸洪武二年徵修禮樂諸書事竣乞歸久之用薦為國子助教以說經為學者所宗十五年遷翰林學士命撰宣聖廟碑稱旨改文淵閣大學士尋遷祭酒學規嚴肅終日端坐講解無虛晷夜恒止學舍帝嘗使畫工矚之圖其像危坐有怒色明日入對帝問昨何怒仲敏驚對曰諸生有趨踣者碎茶器臣愧失教故自訟耳且陛下何自知之帝出圖

仲敏頓首謝嘗應詔陳邊事主屯田之說帝頗採用
其言二十三年卒於官年八十帝自爲文祭之正德
中追謚文恪著有西隱集十卷又有東郡志十六卷
李時遠曰宋公師道尊嚴爲一代典型詩文渾健古
雅同游諸儒皆推之

朱錫鬯曰文恪過元故宮諸詩悲涼酸楚雖初明通
天之表子山江南之賦無以踰之他若華表柱頭相
語鶴秣陵江上獨歸鴻半船涼色潮生海兩岸秋風
浪拍沙斷壁野花迎客權壞墻津柳曬魚罾野航招
客買蓮子沙鳥驚人入荻花出墻御柳先零雨入塞
宮花半謝霜夕陽野飯烹魚釜秋水蒲帆賣蟹船句

亦自佳

王子秋過故宮

離宮別館樹森森秋色荒寒上苑深北塞君臣方駐足中
華將帥已離心興隆有管鸞笙歇劈正無官玉斧沉落日
憑高望燕薊黃金臺上棘如林沈確士云興隆笙名元世祖所製劈正斧名以玉爲

之自殷時流傳至元代朝會時一人執之立於陛下取正人不正之意

萬國朝宗拜紫宸于今誰望屬車塵名聞少室徵奇士驛
斷高麗進美人朝會寶燈沉轉漏授時玉曆罷頒春街頭
野服儒冠老會是花磚視草臣

黃葉西風海子橋橋頭行客弔前朝鳳凰城改佳遊歇龍
虎臺荒王氣銷十六天魔金屋貯八千霜塞玉鞭搖不知

亡國。瀘溝水依舊。東風接海潮。

鬱葱佳氣散無蹤。宮外行人認九重。一曲歌殘羽衣舞。五更粧罷景陽鐘。雲間有闕摧雙鳳。天外無車駕六龍。欲訪當時泛舟處。滿池風雨墮芙蓉。

五雲雙闕俯人間。歲晏天王狩未還。鸚鵡認人官漏斷。水沉銷篆御牀閒。朝儀無復風雲會。郊祀空遺日月顏。莫向邊陲動戎馬。漢兵已過鐵門關。

萬年海岳作金湯。一望淒然恨自長。禾黍秋風周洛邑。山河殘照漢咸陽。上林春去宮花落。金水霜來御柳黃。虎衛龍墀人不見。戎兵騎馬出蕭牆。

清寧宮殿閉殘花。塵世回頭換物華。寶鼎百年歸漢室。錦帆千古似隋家。後宮鸞鏡投江渚。北狩龍旗沒塞沙。想見扶蘇城上月。照人清淚落悲笳。

雲霄宮闕錦山川。不在穹廬毳幕前。螢燭夜遊隋苑圃。羊車春醉晉嬋娟。翠華去國三千里。玉璽傳家八十年。今日銷沉何處問。居庸關外草連天。

詹 同十首

同字同文婺源人幼穎異學士虞集見之曰才子也以其弟槃女妻之元至正中舉茂才異等除郴州學正遇亂家黃州仕陳友諒爲翰林學士承旨太祖下武昌召爲國子博士遷考功郎中直起居注洪武元年與文原吉魏觀等循行天下訪求賢才累官吏部

尚書六年兼學士承旨與樂韶鳳定釋奠先師樂章
又與宋濂爲總裁修日歷七年書成致仕歸久之起
承旨卒諡文憲同文學識淹貫尤深易春秋爲文敏
捷一時莫並歸附後每因事納忠帝極眷重之所著
有天衢舒嘯三卷

宋景濂曰同文襟期瀟灑濟以雄博之學故體物瀏
亮鏗鏗作金石聲

朱錫鬯曰同文與宋景濂吳濬仲樂致和齊名號中
朝四學士吳樂韻語寥寥宋亦非其本色在四子中
遂爲翹楚

汪端論曰同文歷事三姓大節全虧雖有獻替微忠

亦何足道然其詩清峭爽朗自成一格不以人廢言
故仍錄之

題善原道所藏韓幹黑馬圖

善家堂上書滿厨。古今名畫頻卷舒。我來一見韓幹筆。龍
精自與凡馬殊。元鬣披披首渴烏。紫瞳欲欲雙明珠。黑雲
一片忽墮地。房星夜半飛神都。御溝流水柳千樹。圉人騎
出拂春露。黃金腰帶素花衣。馬上回頭看飛絮。絲韁在手
不敢縱。追風恐過龍樓去。君不見向來畫馬只畫肉。神逸
之氣多不足。幹遺真蹟世所稀。使我見此思天育。善家兄
弟一馬驄。此馬真與麒麟同。白璧玉斗亦不換。早晚持獻
明光宮。

出獵圖

朔風凜凜吹龍沙。年年馬上長爲家。陰山大漠百草死。獵
徧青海瀕天涯。旌旗裂盡霜華濕。萬騎貔貅似雲集。蒼鷹
歘起若飛電。四尺神葵作人立。什圍五攻兵法存。發蹤指
示知何人。豈無詭遇獲禽者。誰能爲爾鸞梟分。直將猛氣
飽所欲。寢虎之皮食虎肉。生擒山下九青兕。射殺巖前雙
白鹿。日暮歸來雪洗箭。血灑腥風滿河曲。穹廬散野如繁
星。涼月蕭蕭照平陸。駝漿跪進瑪瑙杯。黃面奚奴眼晴綠。
明朝滿馬馱爛斑。蕃王喜生紅玉顏。焉知祝網三驅意。但
醉觀熊紫塞間。君不見暴殄天物焚咸邱。畫師之筆學春
秋。還君此圖長太息。使我忽憶比蒲菟。駿健有氣

題松澗亭

澗上長松一千尺。松花落澗流香雪。仙韶入夜度晴空。飛
瀑隨風灑秋月。高人於此構小亭。上有雲氣山青青。昨日
客來覓琥珀。旋汲清泉煮茯苓。

送德安張用周遊廬山

匡廬山高雲氣多。老木如石盤紫蘿。松橋流水度金澗。我
昔結屋山之阿。乘落洲邊種柑橘。蓮花峰下尋芝朮。仙宮
臺榭作比鄰。每欲相從問丹術。寄詩畫喚白猿來。巡杏夜
驅元虎出。飛仙別去今幾年。海上不見回樓船。思之夢繞
瀑布水。玉琴爲奏冰絲絃。張君多古學。才氣何卓犖。紛紛
赤豹文狸間。五色麒麟生一角。朝辭白兆山。暮過黃鶴樓。

去觀五老峯。翠色連天浮。醉揮綠玉杯。笑贈珊瑚鈎。商婦
亭前歌窈窕。灌嬰井上嘶驩。讀書白鹿之洞裏。揮翰洗
墨之池頭。匡廬清泉銷百憂。我所樂處君當游。霓旌羽駕
在邱壑。相逢往往皆仙流。與君大葯駐光景。人間回首三
千秋。

秋夜吟

桂樹叢叢月如霧。山中故人讀書處。白露濕衣不可去。只
足已

題雲林丹房圖

盤龍菴前翠可挹。道人鑿雲開竹房。丹光出林如月白。石
髓滿山連水香。每聞向此采芝朮。欲往從君愁虎狼。展圖

使我空歎息。三十六峰清夢長。

拘體皆滿
灑可喜

秋夜簡李希古

江臯秋水明晚霞。江城秋滿詩人家。雙杵隔牆夜敲月。一
燈向壁寒生花。烏鵲驚風繞紅樹。紫蠅帶霜行白沙。清虛
之府入幽夢。醒看河漢思乘槎。

山陰草堂爲友人賦

草堂正在匡廬山。山陰綠玉相對閒。雲從雙劍峰前下。潮
到小姑江上還。茶煙滿室寫墨竹。花雨一簾觀白鵬。誰似
南宮能篆古。爲君高置軒窗間。

舟過黃陵廟

黃陵廟下倚船窗。水淺沙平白鷺雙。山外斷雲寒日晚。半

明三才詩選卷一
蓬殘雪下湘江

水殿納涼圖

湖上闌干百尺臺。臺邊水閣倚雲開。紅橋人隔荷花語。玉
盃金盤進雪來。

胡翰六首

翰字仲申金華人幼聰穎異常兒七歲時道拾遺金
坐守待其人還之長從吳師道吳萊學古文復登許
謙之門受知於黃潛柳貫元末天下亂避地南華山
著書自適文章與宋濂王禕相上下太祖下金華召
見命與許元等會食中書省後以薦召至金陵時方
籍金華民爲兵仲申進曰金華人多業儒鮮習兵籍
之徒糜餉耳帝卽罷之授衢州教授洪武初徵修元
史書成受資歸愛北山泉石卜築其下十餘年而卒
年七十五所著文曰胡仲子集詩曰長山先生集凡
十卷又有春秋集義

朱錫鬯曰明初金華承黃柳二吳諸公之後多以古
文辭鳴顧詩非所好以詩論吾必以仲申爲巨擘焉
獨孤及之論曰五言古詩生於國風廣於離騷著於
蘇李盛於曹劉漢魏作者質有餘而文不足以今揆
昔則有朱絃疎越太羹遺味之歎誦仲申五古正路
幾出於土鼓箏籥生於鳥跡庶幾哉升堂之彥乎宜
潛溪有學林老虎文淵鯨之目也

湘筠辭

湘之山兮西迤。湘之水兮東驚。何箇籜兮孔多。望不極兮
湘之浦。帝子去兮雲中。俾美人兮延佇。曾莫樹兮椒蘭。又
莫奉兮蘅杜。載雨兮載陰。滔滔兮誰與度。將以遺予兮琅
玕。抱幽貞兮永固。意格通似楚辭

擬古

千里不唾井。與君相別難。風塵雖異路。恒願同悲歡。在金
莫為玦。在玉當為環。聯以翠織成。宛轉衣帶間。相望燕與
越。寸心良自堅。日入已三商。憂來翻百端。遙遙託清夢。不
知寒夜闌。

日長自愛惜。夜長復悽惻。人生幾何時。少壯已非昔。涼風

勤萬里。起念南與北。山川路杳杳。車馬去不息。燕趙高聲

名。荆揚壯材力。仲尼七十說。未遇身削跡。為雲不上天。焉

能雨八極。澄懷云結語沉痛

人生苦偏側

人生苦偏側。莫處蠻觸間。殺機起不測。朝夕相構患。尺書

下齊城。丸土封秦關。用意何崎嶇。舉世尚其賢。湯泉水長

溫。蕭邱燄長寒。天地有至性。貧賤吾所安。澄懷云士君子立身不當如是

邪

鬱鬱孤生桐

鬱鬱孤生桐。託根鄒嶧顛。皎皎白素絲。出自岱畎間。一朝
奉庭貢。妙合良自然。桐以為君琴。絲以為君絃。中含希世

音。置君離別筵。征馬慘不嘶。僕夫臨當前。君行千里道。豈
惜一再彈。南風日渺渺。清商動山川。和者昔已寡。聽者今
亦難。慨當以慷

京口紀行

大江風西來。波濤何浩浩。我舟不得發。徘徊越昏曉。衡運
已朔易。曜靈忽東杲。早出南徐州。草乾霜露少。慘慘沙塵
飛。軋軋車輪繞。寒氣來薄人。重裘僅如縞。日高衆鳥翔。天
未孤帆杳。川流與岡勢。合沓自回抱。人生大塊間。孰能出
其表。勉爲辛苦行。益見顏色槁。人言野多虎。前驅善相保。
顧非千金軀。祇欲仗穹昊。共子陳此情。歸來臥蓬島。

梁寅九首

寅字孟敬。新喻人世業農家。貧自力於學。淹貫五經。
百氏元末。辟集慶路儒學訓導。以親老辭歸。洪武初。
徵修禮書。書成將授官。以老病辭。還結廬石門山。四
方士多從之。學稱爲梁五經。又稱石門先生。鄰邑子
初入官。詣孟敬請教。孟敬曰。清慎勤。居官三字符也。
其人問天德王道之要。孟敬曰。言忠信。行篤敬。天德
也不傷財。不害民。王道也。其人退。曰。梁子所言。平平
耳。後以不檢敗。語人曰。吾不敢再見石門先生。孟敬
卒年八十二。著有石門詩文集七卷。又有周易參義。
書纂義。詩演義。詩考。春秋考義。宋史略。元史略等書。
朱錫鬯曰。孟敬入禮局。雖不爲好爵。所縻然。石門集

中感恩頌德之辭不一而足方之抱遺翁似有間矣
故序於通籍者之列

汪端論曰明初者儒能詩者若仲申之古奧孟敬之
冲澹皆矯矯可傳不獨以博學見長也

歸醴溪

久厭都市喧。俛思山巖靜。歸飲醴溪泉。怡我澹樸性。神峯
雜樹擁。石門翠厓並。蘿懸晨露滋。巘秀夕霞映。舉裾蔭雲
松。脫屣悅風磴。悠然遯客心。疊出野人詠。方期谷口耕。毋
謂終南逕。五言頗有陶韋風致

和楊逸人桃林遷居之作

心寂忘塵囂。時清樂巖築。愛此桃花林。葺之杜蘅屋。葛籬
延芳藟。石梁照淺淥。風翔雙白鳥。雨臥一黃犢。東臯雜婦
子。中野見樵牧。賦詩雲霞鳴。攜壺錦繡谷。送君以悠游於
焉謝羈束。

程氏山居

獨居南窗靜。秋木連翠岑。鳴琴衆葉下。把酒孤猿吟。寧負
朱紱願。莫乖白雲心。羨彼歸田叟。高風留至今。

爲臨川章則常題山水圖

山擁衡廬青。水含瀟湘碧。兩厓蟠蛟樹。千歲蹲虎石。遙遙
遡川舟。泛泛騎驢客。憑高者何人。閑看楚雲白。

擬古

雲門輟清響。鄭衛音方揚。錦衣受垢污。不如練布良。軒軒

青雲士。鳴玉升廟堂。名高受讒毀。寵盛罹愆殃。美女惡女
仇。偏聽姦以萌。衆口能鑠金。況乃忘周防。所以君子心。惟
用德自將。行行九折坂。戒哉銜壓傷。

林下

客尋林下居。徑幽不待埽。疎篁延柔蔓。殘果落深草。禽言
人莫知。虎跡僮驚報。何事嬰余懷。甕牖悟天道。

題蔡淵仲默齋

獨坐衆囂寂。靈淵虛以澄。樸拙固吾性。佻巧非吾能。言辭
戒放逸。脣頰思緘滕。吉與躁殊趣。仁以訥見稱。訥譽何
損。嗷嗷時所憎。恐玷懷白圭。來讒忌青蠅。無妄天之佑。主
靜道斯凝。會閔庶可慕。子賜在所懲。萬言不如默。誠哉宜

服膺。名言可
書座右

贈西山僧

高僧自喜巖下住。長見白雲飛復迴。半山風吹松子落。千
歲石作蓮花開。鳥下林堂待分食。龍游溪水遇浮杯。吳山
楚山聊暫住。還把楞伽歸去來。

晚步

竹間樵徑行應熟。花外漁舟望欲迷。處處稻畦分落照。荷
鋤人去水禽啼。

山... 谷... 自... 西...
[Faint bleed-through text from the reverse side of the page]

明三十家詩選初集卷二

錢塘 汪端允莊輯

高 啟 一百七十五首

啟字季迪長洲人少孤力學有文武才家北郭與張羽徐賁王行高遜志宋克唐肅余堯臣呂敏陳則卜居皆鄰近以詩文相砥礪號北郭十友又與楊基及羽賁稱吳中四傑張士誠據吳屢以禮招之季迪策其必敗堅不往挈家依婦翁周仲達居吳淞江之青邱授徒自給洪武初徵修元史尋入內府教功臣子弟授翰林院國史編修三年秋太祖御闕樓召對擢戶部侍郎以孤遠不敢驟膺重寄辭乞放還於鄉復

居青邱初季迪以國史事爲祭酒魏觀屬員觀重其
才行與締忘年交及觀守蘇爲季迪徙居城中夏侯
里接見甚密洪武七年觀以張氏據府舊治爲宮今
治湫隘因按故址徙之吳地多水患復浚錦帆涇以
資民利指揮蔡本與觀有隙爲飛語上聞帝使御史
張度覘之度儉人也誣觀與旣滅之基有異圖遂破
誅季迪嘗爲觀撰府治上梁文度目以黨帝怒併逮
至京論死年三十九季迪癖於詩日課一章當元至
正時會稽楊維禎稱詩東南尙險怪靡麗之習門人
以千數惟季迪與王彝不屑附和其論詩曰詩之要
有三曰格曰意曰趣格以辯其體意以達其情趣以

臻其妙也體不辯則入於邪陋而師古之義乖情不
達則墮於浮虛而感人之實淺妙不臻則流於凡近
而超俗之風微三者旣得而後典雅沖淡豪俊渾厚
清婉奇險之辭變化不一隨所宜而賦焉如萬物之
生洪纖各具乎天四序之行榮慘各適其職又能聲
不違節言必止義如是而詩之道備矣夫自漢魏晉
唐而降杜甫氏之外諸作者各以所長名家不能兼
也學者譽此詆彼各師所嗜譬猶行者埋輪一鄉而
欲觀九州之大必無至矣蓋嘗論之淵明之善曠而
不可以頌朝廷之光長吉之工奇而不足以詠邱園
之致皆未得其全也故必兼取衆長隨事師法待其

時至心融渾然自成始可名大方而免夫偏執之弊
此蓋自道其所得也其詩有江館青邱吹臺鳳臺南
樓榭軒姑蘇雜詠等集罷官後自選爲缶鳴集凡九
百餘首既歿無後夫人周氏藏其手稿以授內姪立
永樂元年立爲梓行千首仍以缶鳴爲名而非原本
門人呂勉痛其冤酷韜晦避禍絕口不談詩文將歿
出季迪詩十卷及所撰小傳授成化進士張習之父
習編次爲榭軒集景泰中吳郡徐庸彙而刻之凡二
千餘首名大全集然字句多舛誤 國朝雍正二年
桐鄉金檀爲校正之復加箋註并其文曰鳧藻詞曰
扣舷合二十四卷重鐫行世云

王子充曰季迪詩雋逸清麗如秋空飛隼盤旋百折
招之不下又如碧水芙蓉不假雕飾翛然塵外
李賓之曰國初稱高楊張徐季迪才力聲調過三人
遠甚百餘年來亦未見卓然有以過之者

楊用修曰季迪一變元風首開大雅

王元美曰國初樹赤幟者二家而已才情之美無過
季迪聲容之壯次及伯温

王敬美曰季迪才情有餘使生宏正李何之間絕塵
破的未知鹿死誰手

徐子元曰季迪岱峰雄秀瀚海渾涵海內詩宗豈惟
吳下

李時遠曰季迪詩佳在寔境得句穠麗而無粉澤清新而復高古足以嗣響盛唐

高德曰太史辭氣春容音律渾雅而光彩自著如清風徐來於修篁古松之間鏘然成韻略無矯飾元吳草廬嘗言詩者譬如釀花之蜂必查滓盡化芳潤融液而後貯於脾者皆成蜜又如食葉之蠶必內養既熟通身明瑩而後吐於口者皆成絲非可強而爲非可襲而取太史之詩是已

繆天自曰季迪詩自古樂府文選金樓玉臺諸體下至李杜高岑王孟韋柳錢劉韓白以及蘇黃范陸虞揭靡所不合此之謂大家誦青邱子歌其自負亦不

淺矣

朱錫鬯曰侍郎跌宕風華鳳觀虎視造邦巨擘所不待言而獻吉仲默別推袁景文爲明初詩人之冠試以諸體相較袁自非高故也又曰世傳侍郎賈禍因題宮女圖詩云女奴扶醉踏蒼苔明月西園侍宴回小犬隔花空吠影夜深宮禁有誰來孝陵猜忌情或有之然集中又有題畫犬詩云獬兒初長尾茸茸行響金鈴細草中莫向瑤階吠人影羊車夜半出深宮此則不類明初掖庭事二詩或是刺庚申君而作侍郎坐魏守事以死好事者因之傳會也

王貽上曰明五言古西涯之流源本宋賢李何以來

具體漢魏互有得失未造古人獨高李迪徐昌穀皇甫子安兄弟薛君采高子業華子潛歸季思寥寥數公窺見六代三唐作者之意

周青士曰李迪長歌嶽峯磊落極其生動

袁子才曰詩有音節清脆如雪竹冰絲自然動聽者此皆由天分非學力可到也在明惟青邱一人而已趙雲松曰青邱才氣超邁音節響亮宗法唐人而自運胸臆一出筆卽有博大昌明氣象亦關有明一代文運論者推爲明初詩人第一信不虛也要其英爽絕人學唐而不爲唐所囿後來學唐者攀附前後七子襲其面貌摹其聲調神理索然則優孟衣冠矣鍾

譚輩又從一句一字標舉冷僻以爲得味外味則幽獨君之鬼語矣獨青邱如天半朱霞照映下界至今猶光景常新則其天分不可及也又曰青邱金陵諸詩清華瑰麗雖王維岑參等早朝大明宮之作莫能遠過又曰歷觀宋金元明諸詩家有力厚而太過者有氣弱而不及者惟青邱適得詩境中恰好地步蓋其用力全在使事典切琢句渾成而神韻又極高秀看是平易實則洗鍊功深此正是細膩風光固不必石破天驚以奇傑取勝也

趙璞函曰青邱七古變化超妙則宗太白排奐沈雄則法杜韓伉健如幽并少年俊邁如王謝子弟洵屬

神品

汪端論曰青邱詩衆長咸備學無常師才氣豪健而不劍拔弩張辭采秀逸而不字雕句繪俊亮之節醇雅之旨施於山林江湖臺閣邊塞無所不宜有明代學古而化不泥其跡者惟此一人而沈歸愚明詩別裁譏其才調有餘蹊徑未化故一變元風未能直追大雅然則必如空同古詩滄溟樂府摹擬餽餉局促轅下乃可謂直追大雅耶若青邱大全集本非手定中有自加刪潤之作編詩者兩存其稿故多複句未可執是謂之蹊徑未化也歸愚欲以復古之說盛推李何故於明初諸家概加貶抑而於青邱尤多微

詞此與鍾嶸論詩置陶潛謝朓於中品同爲藝苑不
平之事正不容不辯也○歸愚每詆青邱樂府以爲
近文昌仲初不知張王樂府微言婉諷真至簡樸可
繼香山秦中吟遠出長吉飛卿之上固未可厚非也
而況青邱之深思逸氣適麗雅潔又遠出張王上耶
○明人近體有先得佳聯後續首尾者往往全篇不
能完善青邱則格律森嚴一氣鎔鑄句中有意句外
有神足徵其功力之深今人嘗以日課一詩之說疑
其滑易少鍊持論亦過刻哉○青邱當元季時不仕
張氏屏居江村其品固邁於陳基張憲諸人入明後
力辭戶曹亦不失明哲保身之義惟爲魏守撰文召

禍論者或議其不自檢束然按明史魏觀傳洪武初建大本堂命觀侍太子說書及授諸王經又命偕文原吉等分行天下訪求賢才所舉多擢用出知蘇州府盡改前守陳寧苛政以明教化正風俗爲治建賢舍聘周南老王行徐用誠定學儀王彝高啟張羽訂經史耆民周壽誼等行鄉飲酒禮政化大行課績爲天下最擢四川參政未行以部民乞畱命還任則觀固儒臣而兼循吏青邱素與文學相契不幸爲酷吏所讒并罹於禍既非盧仝宿王涯第之比尤與死於胡藍之黨者有異也後太祖悟觀冤詔以禮祭葬青邱之枉縱未昭雪其冤已可見已至虞山謂以宮女

圖詩觸太祖怒假手魏守之獄因引昭示諸錄及豫章侯胡美罪狀爲証尤西堂作明史樂府有上梁文一首詠青邱事以爲文人輕薄自取殺身然按明史胡美傳洪武十七年坐法死二十三年李善長敗帝手詔條列奸黨言美因長女爲貴如偕其子婿入亂宮禁事覺並伏誅考其時距青邱歿已十餘載則因詩而死之說尤爲無稽竹垞嘗有辨而未甚詳爰爲擴其說焉明史又載江夏侯周德興以子驥亂宮被誅及陸雲士集所記潭王梓事皆在胡美事敗後與青邱之詩更無涉矣

○悲歌

征塗嶮巇人乏馬。饑富老不如貧少。美游不如惡歸浮雲。

隋風零落四野仰天悲歌泣數行下李時遠云不數漢魏

古詞

妾刀不斷機郎行當早歸還將機中錦作郎身上衣勸勉之意

說得蘊藉

薊門行

行行光祿塞望望單于臺天寒水草盡萬里孤軍來中國多荒土窮邊何用開又塞下曲云得地不足耕殺人以為功同一警策足為開邊者垂戒

涼州詞

關外垂楊早換秋行人落日旆悠悠隴山高處愁西望口有黃河入漢流沈確士云高渾

古別離

他人豈不別所別諒有由嗟君今何營輕薄好遠游遙遙京洛車汎汎江漢舟君身非賈胡所至輒逗留徽音已冥邈思懷尚綢繆露滋紅蘭春霜變綠桂秋此時望歸來含情上高樓川塗本無限君去焉得休願令中斷阻化彼山與邱怨而不怒風人之遺

結客少年場行

結客須結游俠兒借身報讐心不疑千金買得利七首摩挲誓許酬相知白馬縵胡纓行人盡止朝游洛北門暮醉秦東市感君在一言不惜為君死朱家曾脫季將軍田光終酬燕太子君不見魏其盛時客滿門自言一一俱銜恩魏其既罷誰復見養士堂中塵網遍始知結客難徒言

意氣傾南山。食君之祿。有不報。何況區區杯酒間。結客不
必皆薦紳。緩急叩門誰可親。屠沽往往有奇士。慎勿相輕
問里人。

猛虎行

陰風吹林鳥。鵲悲猛虎欲出人。先知目光燿燿當路坐。將
軍一見弧矢墮。幾家插棘高作門。未到日落收雞豚。猛虎
雖猛猶可喜。橫行只在深山裏。意在言外

采茶詞

雷過溪山碧雲暖。幽叢半吐旗槍短。銀釵女兒相應歌。筐
中摘得誰最多。歸來清香猶在手。高品先將呈太守。竹爐
新焙未得嘗。籠盛販與湖南商。山家不解種禾黍。衣食年

年在春雨。新雋

班婕妤

微誠雖可守。妙舞却難工。已別增成舍。初來長信宮。扇歸
秋篋裏。燭滅夜帷中。莫忌爭新寵。會辭玉輦同。工於諷諭。却極溫婉。

鑿渠謠

鑿渠深一十尋。鑿渠廣八十丈。鑿渠未苦莫嗟呀。黃河會
開千丈餘。君不見賈尙書。澄懷居士按賈尙書指賈魯元。至正辛卯以工部尙書充河防。使發河南北兵民十七萬開黃河。故道二百八十里。未幾天下兵起。

築城詞

去年築城卒。霜壓城下骨。今年築城人。汗灑城下塵。大家
舉杵莫住手。城高不用官軍守。澄懷云此指至正己亥張士誠大發浙西之民築杭

城事諷刺深冷
與劉文成作同

將軍行

將軍結髮從鞍馬。新領前軍號橫野。面謾不數屠狗兒。負
勇會擒射鵰者。狼星掃天芒角斜。大旗獵獵吹風沙。黃金
傾盡養部曲。匈奴未滅何爲家。前日賢王五千騎。直入朝
那殺邊吏。天子初聞怒赫然。出師誓奪河南地。五營材官
原是多。詔書未須徵七科。已御明堂推畫轂。還開武庫授
彫戈。灞陵原頭軍晚發。北出雲中與高闕。單于一夜六騾
逃。大漠無人惟漢月。塞下從今烽火稀。朝臣共賀震皇威。
人生寧似功成樂。白日長安鼓吹歸。似高常侍

楚妃歎

章華臺前楚江水。月色墮煙烏欲起。六宮不敢解羅衣。獵
火照山君未歸。

阿那瓌

牛羊草漫野。大帳天山下。十萬控弦兒。聞籥齊上馬。吳明
卿云

里巫行

里人有病不飲藥。神君一來瘦鬼却走迎。老巫夜降神。白
羊赤鯉縱橫陳。男女殷勤案前拜。家貧無肴神勿怪。老巫
擊鼓舞。且歌紙錢索索陰風多。巫言汝壽當止。此神念汝
虔賒汝死。送神上馬巫出門。家人登屋啼招魂。張王所不
能爲歸愚

事鬼詩襲用其意便如土苴
木偶只是用筆靈拙之別

主客行

主人楚歌客楚舞。落日黃雲雁聲苦。笑拂腰間寶劍光。美人滿堂色如土。大兒北海人中奇。小兒能讀曹娥碑。相逢且莫歎貧賤。但願有酒無別離。君不見平原墓上生秋草。國土無窮道傍老。高唱人雲

春江行

春江南北疑無岸。綠草綠波連不斷。一女紅粧出浣紗。恰如鏡裏見桃花。袂衣猶冷過寒食。雲度春陰半江黑。浦口風多潮正深。輕舟搖蕩似人心。鷓鴣暮啼歸路遠。飛絮茫茫。楚王苑。夷猶婉約風致天成

征婦怨

良人不願封侯印。虎符遠發當番陣。幾夜春闈惡夢多。竟得將軍軍覆信。身沒猶存舊戰衣。東家火伴為收歸。妾身不識邊庭路。尋骨何由到武威。紙幡剪得招魂去。只向當時送行處。渲染婉惻不忍卒讀

楊柳枝

高枝拂翠憶低枝。垂綺筵。春風干。萬樹此樹妾。門前。言不盡意

廢宅行

鳴珂坊裏將軍第。列戟齊收朱戶閉。里媪逢人說舊時。有廬被奪廣園池。今年沒入官為主。散盡堂中義宅兒。厨煙久斷無梁肉。羣鼠饑來入鄰屋。官封未與別人居。日日閉苔雨。添綠曲閣深沈。接後房。畫屏生色暗無光。尋常不敢

偷窺處守卒時來拾墜璫春風多少奇花樹又有豪家移
得去可諷可戒

吁嗟篇

惻惻抱深隱靡靡踰崇邱凜凜歲欲徂役役車未休不辭
車未休但傷歲莫留窮陰蔽九野徒侶同時憂豺虎當路
啼猿猱出林游我饑雪作糧我寒又無裘徒思陽春日誰
返羲和輶天時自有常淚下還復收結處得性情之正高
於士衡明遠樂府

朝鮮兒歌

朝鮮兒髮綠初剪齊雙眉芳筵夜出對歌舞木棉裘軟銅
環垂輕身迴旋細喉轉蕩月搖花醉中見夷語何須問譯
人深情知訴離鄉怨曲終拳足拜客前烏啼井樹蠟燈然

其訝元菟隔雲海兒今到此是何緣主人為言曾遠使萬
里好風三日至鹿走荒宮亂寇過雞鳴廢館行人次四月
王城麥熟稀兒行道路兩啼饑黃金擲買傾裝得白飯分
餐趁鮑歸我憶東藩內臣日納女椒房被禕翟教坊此曲
亦應傳特奉宸游樂朝夕中國年來亂未鋤頓令貢使入
朝無儲皇尚說居靈武丞相方謀卜詐都金水河邊幾株
柳依舊春風無恙否小臣撫事憶昇平尊前淚瀉多於酒
澄懷按元順帝奇后高麗人有寵生太子於帝廢之致高麗亂鹿走
以私憾讒高麗王伯顏帖木兒於帝廢之致高麗亂鹿走
荒宮句指此儲皇句指李羅帖木兒之變太子出奔太
原依擴廓帖木兒欲用唐肅宗故事自立擴廓不可乃止
丞相句指擴廓受詔南征關中李思齊等四將不聽約調
擴廓引兵攻之相持經年順帝遣使諭擴廓罷兵專事江
淮不聽此蓋以遷許都此歌與後聽郭芳卿弟子歌同
事比擴廓之跋扈也一忠愛而敘次格局更為邁健

新絃曲
舊絃解新絃。張冰絲牽愁六尺長。寬急頻從指邊聽。金雁參差移不定。新絃響高調易促。不如舊絃彈已熟。憐新厭舊。妾恨深爲君試。奏白頭吟。他日愁如舊。絃棄泣。向羅裙帶頭繫。

顧榮廟

晉侍中顧彥先有墓并祠長洲之東久而廢爲淫祀縣令周君復之爲賦是詩

軍司吳國秀機神夙超朗。弱冠遊洛師。已蒙南金賞。崎嶇諸王幕。沈涵務遵養。中罹廣陵艱。計服匪誠枉。風雲一揮扇。義旅臻同響。事成恥言勲。飄然理歸鞅。晉社始東遷。羣

賢悉收獎。道謁真感會。矯翼丹霄上。德間一代稱。跡混千齡往。時屯乏良佐。英謨益堪想。墳祠托荒郊。蕭條並榛莽。蕘童侵雨隧。淫巫闖塵幌。大夫過停轅。式瞻爲含愴。衣冠復故貌。筵几陳新享。寡劣忝鄉人。因歌表遐仰。李舒章云似謝康樂

池上雁

野性不受畜。逍遙戀江渚。冥飛惜未高。偶爲弋者取。幸來君園中。華沼得遊處。雖蒙惠養恩。飽飼貸庖煮。終焉懷慙驚。不復少容與。耿耿宵光遲。城城寒響聚。風露秋叢陰。孤宿斂殘羽。豈無鳧與鶩。相顧非舊侶。朔漠饒燕雲。夢澤多楚雨。遐鄉萬里外。哀鳴每延佇。猶懷主恩深。未忍輕遠舉。儻令寄邊音。申報聊自許。用意温厚

題秋林高士圖

二仲有玄賞。相攜在中林。遐景延迴步。微言諧素襟。天秋
谷響哀日暝。川光陰風駛。多委葉山空。少歸禽威遲。臨長
岡。迢遞指遠岑。諒非羈離客。詎用愁登臨。古澹

尹明府所藏徐熙嘉蔬圖

少賤習圃事。種蔬每盈疇。深根闕玄冬。老葉凌素秋。採擷
風露餘。山庖足嘉羞。故園經亂後。蔓草日已稠。野水流畦
間。蟲聲暮啾啾。披圖似見之。惻愴起我愁。食肉豈無人。斯
世誰與謀。君多恤民意。毋忽歲饑憂。小題亦能見憂時之意斯為大家

送上海石明府

三月熟桑椹。四月落棗花。布穀樹下飛。塘轉邨路斜。東墜

擊耕鼓。西林擲線車。但言此地樂。不聞此地嗟。雖無夕烽警。尚苦秋賦加。煩君始到日。為我問田家。
潘次耕云。合幽詩。鄭圖為一非仁人君子安得此言

天平山

入山旭光迎。出山月明送。十里松杉風。吹醒塵土夢。茲山
凡幾到。題字遍巖洞。陽崖樹冬榮。陰谷泉夏凍。怪石立誰
扶。靈草生豈種。白雲蒼然來。諸峰欲浮動。高鶻有危棲。幽
禽無俗哢。凌蘚知履滑。披嵐覺裘重。嘗登最上巔。遠見湖
影空。漁樵渡谿孤。鳥雀歸村眾。還尋老僧居。隔竹聽清誦。
慰我躋攀勞。為設茶筍供。幾年歷憂歡。造物若擲弄。迷途
遠山林。遲暮堪自訟。誰追謝公遊。空發阮生慟。身今解組

綬明時愧無用。閒持九節筇。尋訪事狂縱。石屋秋可眠。山猿許分共。青邱山水諸詩不必規撫大謝而秀色可挹斷非宏正間人所能歸愚僅選支遁庵一首又非佳什真不可解

贈羣上人

湖雨洗秋碧。西南見諸峰。中有楞伽僧。迴闕超世蹤。高風搖飛泉。落日帶遠松。欲往已知處。煙蘿鳴飯鐘。左司風格

天池

靈峰可度難。昔聞枕中書。天池在其巔。每出青芙蓉。湛如玉女盆。雲影含夕虛。人靜時飲鹿。水寒不生魚。我來屬始春。石壁煙霞舒。澹澹月出後。泠泠雪銷餘。再汎知神清。一酌欣慮除。何當逐流花。遂造僊人居。

明月灣

木葉秋乍脫。霜鴻夜猶飛。扁舟弄明月。遠度青山磯。明月處處有。此處月偏好。天濶星漢低。波寒菱荷老。舟去月始出。舟迴月將沈。莫照種種髮。但照耿耿心。把酒醉水僊。容我宿湖裏。醉後失清輝。西巖曉猿起。

南峰寺

樵歸衆山昏。天峰尚餘景。欲投石門宿。更度西南嶺。遠聞雲間鐘。蘿逕入寺永。懸燈照靜室。一禮支公影。鳥鳴澗壑空。泉響窗戶冷。對此問山僧。何如沃州境。

毛公壇

欲觀漢壇符。東上縹緲峰。葛花墜寒露。夕飲清心胃。月出

太湖水鶴鳴空。澗松真境久寂寥。蒼苔閱靈蹤。嘗聞綠毛
叟。變化猶神龍。世人豈得見。偶許樵夫逢。攀險力易疲。探
玄志難從。歸去白雲外。空聞仙觀鐘。

松江亭

泊舟登危亭。江風墮輕幘。空明人遠眺。天水如不隔。日落
震澤浦。潮來松陵驛。縣縣洲激平。莽莽葭積積。凭闌不敢
唾。下有龍窟宅。帆歸雲外秋。鳥下煙中夕。欲炊菰米飯。待
月出海白。喚起弄珠君。閒吹第三笛。

題陳生畫

前峰夕陽明。後嶺秋嵐積。葉落露山村。潮來沒江石。遙遙
射雁子。慘慘聽猿客。何事下征帆。西陵渡頭驛。

早過南湖

湖黑月未出。蒹葭露淒淒。榜人識浦激。不畏荒煙迷。殘夢
詎可續。舟搖櫓聲齊。開篷望天邊。斗柄插水低。津遙未見
樹。邨近纔聞雞。自嗟遠遊人。中宵走東西。不如沙頭雁。宛
頸猶安棲。寫景清絕

答衍師見贈

衍師本儒生。眉骨甚疎峭。軒然出人羣。快若擊霜鷁。早嘗
垂長紳。挾冊誦周邵。欲陳興壞端。往應乞言詔。乾綱會中
頽。四海起攘剽。仰頭望天肩。氛祲匿羲曜。藩邦日尋兵。纒
玉罷朝頰。木顛豈繩維。長往遂淪耀。披緇別家人。欲挽首
屢掉。超哉休遠徒。高躅願追紹。初來北城刹。駐錫問宗要。

相逢共宵哦。篝火樹間照。篇成出叩鉢。鋒疾驚楚僇。我或
勸之冠。不答但長笑。雷連忽中離。名山赴佳召。頗知此行
樂。夙志酬。歷眺吳峰戴。襟登楚水投。文弔江秋雨。鳴瀨海
曙霞。發嶠靈奇務。窮蒐不憚躡。遐徼東歸始。安禪幽谷斬
蓬藿。坐敷雲中袞。薜屋一澗繚。前年逐戎旃。野出事田燎。
是時陰飈作。山黑捲狂燒。不畏猛虎過。車宿傍楓廟。聞師
隔煙嶺。無寐聽猿叫。晨興雪滿壑。衣溼寒未燎。空林斷樵
蹤。兀兀見來轎。相邀至巖扉。杉竹穿窳窳。深房煮山藥。乾
葉燄風銚。頓釋行旅顏。瓢綠欣飲。醕促還不能。淹喧寂歎
殊調。邇來竟何成。三十匪年少。恨無關弧力。結束從嫖姚。
閒坊借書披。危坐似持釣。行憂釜見奪。謁恐冠遭溺。逢人

戒談時澀。縮刀在鞘。軍聲五月急。市粟無賤糶。壯氣漸欲
磨。妻孥困纏繞。堂筵賓履疎。暑夕行熠燿。師來贈長句。有
譽無鄙訕。組章眩芬莩。金奏聆要眇。據梧起豪誦。心疾渾
可療。回顧平生吟。真咽蚯蚓竅。上天宰玄化。亂治方回料。
性命如窮鱗。儻獲脫罾罟。卜居計已決。不待龜灼焦。過湖
就稻蟹。靜處容不肖。安能效羣女。倚市鬪妍妙。詠風或鳴
撓。耕月還荷蓀。師當重見尋。東臯一舒嘯。趙雲松云骨堅
氣勁全學杜陵

登西城門

登城望神州。風塵暗淮楚。江山帶睥睨。烽火接樓櫓。并吞
何時休。白骨易寸土。向來禾黍地。雨露長榛莽。不見征戰
場。那知邊人苦。馬驚西風笳。鳥散落日鼓。嗚嗚城下水。流

恨自今古

陳氏秋容軒

西郊莽迢遞。川樹凝煙景。雨過落紅葉。斜陽半江冷。蟬鳴山欲暗。雁去天逾永。孤客對蕭條。應嗟鏡中影。結二語寫容字靈妙

言懷

朝游荒岡陲。暮行空潭側。我非楚大夫。何有憔悴色。良辰思遠騁。周道廣且直。我馬力不前。回駕任偃息。踟躕阻修程。日夕睇西北。苟安非余志。所懼時未識。言簡意深

龍門

龍門何崢嶸。此地表奇蹟。山分兩崖青。天豁一罅白。知非禹功鑿。應是鬼斧劈。長爲風雨關。開闔自朝夕。深含未吐

雲對峙。不崩石。日光寒。易傾苔。色陰更積。只疑過此內。便與人境隔。始窺已幽深。漸入尤險窄。暗中把危藤。蜿蜒欲驚魄。僧畱看古刻。敲火照絕壁。晚聞松竹號。洵若波浪激。不知神魚飛到此。誰點額。刻畫幽峭

虎邱次清遠道士韻

神仙不可羈。乘螭躡雲漢。豈將避羸劉。荒山事窮竄。何年東觀海。一至此峰翫。悠悠清詩傳。宵宵遺蹟漫。我來繼登臨。長嘯憤初岸。既秋煙蘿疎。欲雨風竹亂。夜深空潭黑。月吐石壁半。龍驚汲僧來。鳥喜游客散。閣掩林下夕。鐘鳴巖中。日勝賞誰能。窮今古付篇翰。飛騰子何之。汨沒余可歎。安得契真期。超然豁靈贊。

夢鍾離兩兄

淮水去不絕。淮山與偕馳。鍾離兩遷客。路遠歸何期。孰云歸無期。此夕乃見之。握手說辛苦。杯觴復同持。須臾忽驚別。我夢方自知。雖夢亦足喜。況乃歸來時。真摯

雨中遣興

積雨坐無悶。端由便寂寞。好鳥不頻啼。閒花自遲落。行園每度徑。望岫時登閣。只此可終朝。何當有樽酌。三四遍 真石丞

春草堂

陳彥兼奉節母之所

靡靡堂廡草。託根近華楹。膏露既灌芳。惠風亦揚馨。匪蒙陽和力。孰使微物榮。中天駛景流。青節坐易盈。但憂德澤遠。豈惜憔悴并。願言相蔓結。遮彼春逝程。寸心雖難報。拔

去還當生。

何遜東野

題畫鷹

高風動古壁。竦立見蒼鷄。軒然欲飛揚。嗟此粉墨妙。秋筋束老骨。天寒勢逾矯。腦枯草中兔。氣盡檜上驃。健鶻雖百餘。凡材豈同調。乾坤正肅殺。怒氣號萬竅。大野開平蕪。悲臺落殘照。荒城有妖狐。夜作猛虎嘯。為君試一擊。壯士慙勇剽。安能飽拳肉。側翅隨年少。寫此神俊姿 充君眼中物

送程校理遊江上

風亭裊離管。草綠江水暮。送此南浦人。孤帆雨中渡。別觴足自緩。前驛花滿路。春叢戀山鷺。晚絮迷汀鷺。我今獨愁居。芳月誰與度。佇立望遙波。相思積煙霧。李舒章云娟秀

四柏

堂前四小柏。羅立二尺長。始栽附南墀。遠移自東岡。春夏
衆草芳。翳沒成久荒。低枝網蟲縣。暗葉螻蟻藏。不沾夕露
氣。每隔朝陽光。我病廢芟理。覽之屢彷徨。玄冬戒嚴候。迅
風激飛霜。蕪穢忽自除。鬱然露蒼蒼。恍若羣梟散。鳩雛得
翱翔。乃知受命正。雖弱自可強。循步賞勁色。撫攀挹微香。
幸得依我居。勿令縱牛羊。他年培養成。凌雲孰能量。後凋
誠足貴。蚤厄庸何傷。寓意處見身分

送家兄西遷

昔別歸有期。此別去何極。西遷屬事變。咎責非已得。家貧
無行資。空橐辭故國。囟囟逐徒旅。宛宛謝親識。牽攀不能
留。慟哭野水側。離鴻爲迴翔。浮雲暮愁色。別時雖云苦。未
若別後憶。願行勿憂家。養親自我職。殊方氣候異。炎霧秋
未息。委命無怨尤。長年強餐食。風雅不遠

曉臥丁校書西軒

窗月淡欲失。矐矐逼初曙。屋外鳥聲多。應知有嘉樹。殘香
掩幽寢。未事澄紛慮。頗似宿東巖。僧齋竹深處。屋外二語似柳儀曹

看刈禾

農工亦云勞。此日始告成。往穫安可後。相催及秋晴。父子
俱在田。札札鎌有聲。黃雲漸收盡。曠望空郊平。日入負擔
歸。謳歌道中行。鳥雀亦羣喜。下啄飛且鳴。今年幸稍豐。私
廩各已盈。如何有貧婦。拾穗猶惇惇。真樸近儲太祝

始歸田園

辭秩還故里。永言遂遐心。豈欲事高騫。居崇白難任。清晨
問田廬。荒蹊尚能尋。秋蟲語左右。翳翳桑麻深。別來幾何
時。舊竹已成林。父老喜我歸。攜榼來共斟。聞知天子聖。歡
然散顏襟。相期畢租稅。歲暮同謳吟。有江湖魏
白露蕪草本。荒園掩窮秋。歸來一芟理。始覺吾廬幽。高柳
蔭巷疎。清川映門流。落日望禾黍。離離滿西疇。乍歸意自
欣。策杖頻覽遊名宦。誠足貴。猥承懼愆尤。早退非引年。皇
恩未能酬。相逢勿稱隱。不是東陵侯。措詞命意
不亢不卑

寓感

志士徇功業。貪夫詫輕肥。亦有逃羣子。矯矯與時違。彼此

更相笑。不知誰是非。達人體自然。出處兩忘機。浮雲游天
表。舒卷有餘輝。

駑馬放田野。志本在豐草。偶遇執策人。驅上千里道。顧非
乘黃姿。豈足辱君皂。負重力不任。哀鳴望穹昊。奈何相逢
者。猶羨羈絡好。

蜀琴有奇絃。本是枯桐枝。一彈舞鸞鶴。再彈下靈祇。曾持
薦黃帝。雲中奏咸池。棄置久不調。流塵被朱絲。終焉含妙
響。未始有成虧。卽不采而佩
於蘭何傷意

南山多浮雲。北山有高樹。因風暫來依。風回復飛去。兄弟
滿四海。幾人此相遇。握手交百歡。分襟滋千慮。蹤跡不可
常。無爲嗟去住。

鴻鵠橫四海。鷦鷯戀蓬榛。長松凌風煙。小草亦自春。各稟造化育。逍遙適其真。無將赫赫者。下比棲棲人。潘次耕云。為早退自得之詞。與傲然不屑者迥別。

早過蕭山歷白鶴柯亭諸郵

客起何太早。郵荒絕雞鳴。況時江雨晦。不得見啟明。凌兢度高關。山空縣無城。隔林聞人呼。已有先我行。側身避徑滑。聚足防厓傾。衣寒復多風。漉漉遠水聲。千峰霧中過。不識狀與名。嵐開見前郵。始覺歷數程。越禽啼楓篁。冷日傍午晴。煙生沙墟寂。葉落澗寺清。登臨亦可悅。但恨時非平。

聞長槍兵至出越城夜投龕山

列藩逼戎亂。駐鉞實此州。如何殺大將。王師自相讐。我來

亂始定。城郭氣尚愁。又聞有鄰兵。倉卒豈敢留。促還出西門。天寒絕行輶。古戍暗雨雪。旌旗暮悠悠。野屋閉不守。澤田棄誰收。居人且奔逃。遊子安得休。逶迤蒼山去。泱泱玄雲浮。人虎爭夜行。風榛嘯巖幽。我徒戒相親。一失未易求。饑拾谷口粟。寒燒澗中樵。神迷路多迂。再宿達海陬。雖嘗登頓勞。幸免追辱憂。聖尼畏于匡。嗟我敢有尤。但慙去越早。不遂名山遊。澄懷云。紀行諸詩法。杜而不涉摹仿之跡。○按至正中張明鑒聚眾淮西號青軍。又號長槍軍。黨眾暴悍。由舍山轉掠至揚州。為民害。後明祖遣穆大亨擊降之。○如何殺大將。指拜住哥受方國珍賂謀殺邁里古思紹興大亂之事。

登鳳凰山尋宋故宫遺跡

茲山勢將飛。宮殿壓其上。江潮正東來。朝夕似奔嚮。當時

結構意欲敵汴都。壯我來百年後。紫氣愁不王。烏啼壁門空。落葉滿陰障。風悲度遺樂。樹古羅嚴仗。行人悼降王。故老怨姦相。蒼天何悠悠。未得問興喪。世運今復衰。淒涼一同望。得少陵九成宮詩意

登海昌城樓望海

百川浩皆東。元氣流不息。混茫自太古。於此見容德。積陰漲。哀濤萬里失。空色鴻鵠去不窮。魚龍變莫測。朝登茲樓望。動盪豁胸臆。始知滄溟大。外絡九州域。日出水底宮。煙生島中國。寬疑浸天爛。怒欲吹地昞。常時烈風與海若不。受職長隄此。宵潰頻勞負薪塞。況今艱危際。民苦在墊溺。有地不可居。瀕洞風塵黑。安得擊水遊。圖南附鵬翼。

出郊抵東屯

故鄉一區田。自我先人遺。賴此容我懶。不耕坐待炊。霜露被寒野。屬當斂穫時。年來徵薄入。稅駕宿東陂。今年雖未豐。亦足療我饑。萬鍾知難稱。保此復何辭。

坐久體不適。卷書出柴關。臨流偶西望。正見秦餘山。野淨寒木疎。川長暝禽還。此中忽有得。怡然散襟顏。遂同樵牧歸。歌笑落日間。自然處漸近陶公

姑蘇臺

金椎夜築西山土。催作高臺貯歌舞。文身澤國構王基。却笑先人獨何苦。銅溝玉檻盛繁華。幻出峰頭一片霞。望處直窮三百里。役時應廢幾千家。蟠空曲路迷仙仗。攀盡瑤

梯纜到上。外繞雕龍宛轉欄。中施繡鳳葳蕤帳。熏爐長爇
鬱金香。共道千齡樂未央。茂苑月來秋。佩冷洞庭雨。過夏
綃涼。當窗衆妓如仙女。揚袂迎風欲輕舉。人從天上見。經
過鳥向雲間驚。笑語日暮橫塘花盡開。捲簾臺上望王來。
宴舟初自觀魚返。獵騎還從射鹿迴。從登不用持鉞隊。自
列紅妝侍高會。香傳羅帕進黃柑。縷切鸞刀供玉鱠。燭光
遠落太湖波。驚起魚龍出。沒多城上烏啼河。漢轉此時誰
問夜。如何管絃嘈。嘈聒人耳不聞兵。來渡溪水欲攜西子
走。登舟醉倚畫篷嬌不起。暝日無因到甬東。可憐一炬綺
羅空。獻楣竟墮讐人計。賜劔應辜諫士忠。客來試問遺宮
路。物色荒涼總非故。寒裳始信不虛言。滿地荆榛見零露。

當年爭奪苦勞機。却把江山付落暉。聞說越王臺殿土如
今。亦有鷓鴣飛。
麗而有骨
元白勝境

穆陵行

永穆陵宋理宗陵也在會稽元至元初西僧揚發輦真
住請發宋諸陵許之既取其殉寶復以理宗頂骨爲飲
器後籍入官以賜帝師天兵克元詔求得之命有司歸

葬焉

樓船載國沈海水。金槌晝入三泉裏。空中玉馬不聞嘶。日
落寢園秋色起。魚燈夜滅隧戶開。弓劍已出空幽臺。髡胡
諳識寶氣盡。六陵松柏悲風來。玉顛深注。駝酥酒。誤比戎
王月支首。百年帝魄泣穹廬。醉骨飲冤愁不朽。幸逢中國

真龍飛一函。雨露江南歸。環佩重遊故山月。冬青樹死遺
民非。千秋誰解銅南山。世運興亡覆掌間。起輦谷前馬蹄
散。白草無人澆麥飯。元諸陵在○蒼涼頓坐遠勝
起輦谷○貝清江之作

題米元暉雲山圖

海岳老仙非畫工。自有邱壑藏胸中。大兒揮灑亦莫比。妙
趣政足傳家風。敷文閣下書幃淨。夢入空山覺衣冷。拈
絲筆寫幽蹤。一片飛來楚雲影。彷彿三湘與九疑。翠峰猶
抹二蛾眉。水生江上鴻歸後。樹暗沙頭春去時。蒼蒼遠渡
連平麓。煙火參差幾家屋。林深谷靜斷人行。唯有禽聲啄
枯木。偶向高齋玩此圖。斷縑猶費百金沽。自緣絕筆人間
少。如此雲山何處無。

題趙希遠畫宋杭京萬松金闕圖

長松掀髯若羣龍。龍下繞宮闕。雲千重。鳳山頭望前殿。翠
濤正涌金芙蓉。海門日出潮初上。白鷗飛來近仙掌。百官
候。綴紫宸班。露滴朝衣氣。森爽漢宮。柳柳唐宮花。容易零
落空繁華。何如可獻至尊壽。茯苓美似空同瓜。鑿輿因戀
湖山好。樓閣清陰勝蓬島。不知風雨汴陵前。鹵卒新樵幾
株倒。當日榻前初進圖。黃金趣賜聞傳呼。何年流落在人
世。父老猶看思舊都。客行近過吳山下。落葉空林惟敗瓦。
豈無畫史似前人。秋色淒涼不堪寫。二詩清警跌宕結處
皆用翻案法更妙

夏珪風雪歸莊圖

江雲黏波晚模糊。青山忽失如亡逋。乾坤瑩淨冰作壺。春

意散入千林枯野橋古渡行人無清響瑟索鳴殘蘆江天
萬里一老夫短蓑如蝟舟如鳧魚寒入泥不上屐歸來遠
識漁村孤柴門夜叩聞犬呼逕竹壓折誰相扶山妻自炊
稚子沽不羨炙肉圍紅爐嗟予客遊歲屢徂詩囊隨驢走
顛奴長安何處覓酒徒飛花撲頭帽不烏旅舍無夢還江
湖慙對風雪歸莊圖無一字不真
無一韻不穩

送張員外從軍粵上

鷓鴣啼霜海城白誰埽行車出南陌刀頭裝得願酬恩知
是狂遊廣州客擊筑悲歌斗酒前又從飛將去臨邊幕中
草檄風生筆馬上吟詩月在鞦韆聲萬里隨征雁南北長
江竟誰限明朝若上越王臺應有中原陸沈歎所感者深
音節亦健

詠雪禁體次徐幼文韻

邊城雪埋深沒斲風旋餘花吹酒盃幾人遮鹵渡冰河直
指彎弓不能滿我方高枕聽蕭瑟却喜今年瘴全洗寒添
柳院覺春遲明透竹窗驚夜短未成豪飲圍翠袖且辨清
吟呵象管鋪庭擁路埽難開三日不消知待伴翻疑塞北
雲正冷可信江南地先暖愁封小窟僵蟄蟲驚折危柯殞
巢卵林中樵絕暮無煙野外獵來晨有曠趙女依稀舞態
斜鄂人寂寞歌聲斷此時自歎少清歡月下閉門誰解款
山居老客雖苦病放曠猶能類中散長鬢踏凍送詩筒白
戰令嚴烏敢緩開簾尙恨不同賞醉看帽欹仍褻袒祇期
明日有晴曦遠訪梅花須勿懶奇崛處不
讓坡公

寒夜泛湖至東舍
漁村港頭初月上。鷺鴨不收菰。荻響隔湖煙寺遠。鐘來居
人盡歸。吾獨往。寒風蕭蕭寒浪生。舟中欠載酒壺行。東家
未宿。如相待黃葉青燈。機杼鳴。清逸如畫

姚烈婦

城頭黑雲如壞屋。車走爭門折千軸。姚家新婦亦東逃。舅
姑驚惶兒女號。自知數口難俱免。欲渡前溪舟尚遠。囑夫
棄妾當奉親。獨赴清流不愛身。此日誰能問南史。如婦會
書。幾人死。結二語亦是南史之筆

幼住精舍尋梅

郭西雪後尋僧院。短竹穿沙水如練。梅花有待我來催。十

日春寒未開徧。忽思前日渡江水。夜解征帆宿山縣。偶逢
一樹在官廨。爲寫新詩冰滿硯。關山夢別今五年。縞袂誰
家月中見。自慙喪亂尙飄泊。淚眼如看故人面。黃昏酒醒
逐寒影。繞樹千回意無倦。南枝北枝亂如雪。未許東風吹
一片。名園桃李盡荆榛。空谷獨開君莫怨。重來省視兩何
如。惆悵歸時有餘戀。迴環折宕如怨如慕

張中丞廟

延秋門上烏啼霜。羯兒曉登天子牀。江頭老臣淚暗滴。萬
乘西去關山長。公卿相率作降鹵。草間拜泣如羣羊。當時
不識顏平原。豈復知有張睢陽。孤城落日百戰後。瘦馬食
盡人裹瘡。男兒竟爲忠義死。碧血滿地嗟誰藏。賀蘭不斬

上方劔英雄有恨何時忘千年海上見祠廟古苔叢木秋
風荒摩挲畫壁塵網裏勇氣嗟嗟虬髯張巫歌大招客醉
酒忠魂或能來故鄉史斷不須費詞

唐昭宗賜錢武肅王鐵券歌

妖兒初下含元殿天子仍居少陽院諸藩從此擁連城朝
貢皆停事攻戰岐王已去梁王來長安宮闕生蒿萊天目
山前異人出金戈雙舉風煙開羅平惡鳥啼初起犀弩三
千射潮水歸來父老拜旌旗醜酒槌牛宴鄉里打球駿馬
驕春風錦袍玉帶真英雄詔書特賜誓終始黃金鏤字旌
殊功虎符龍節彤弓矢後嗣猶令赦三死盡言恩寵冠當
時天府丹書未踰此摩挲舊物四百年古色滿面凝蒼煙

天祐宰相署名在尋文再讀心茫然古來保族須忠節受
此幾人還覆滅王家勲業至今傳不在區區一方鐵人生
富貴知幾時泰山作礪徒相期行人會過表忠觀風雨斷
蘇埋殘碑古來四語淵淵有金石聲

中秋翫月張校理宅得南字

八月望夜天如藍海色捲霧山收嵐玉盤元沈龍窟底忽
起萬丈誰能探初來空中光尚溼嬌娥寒鬢風鬢鬢人言
一年此最好金精水氣秋相涵小星盡去大星在芒角欲
吐敢與參天將洗眼照下土啖食肯縱妖墓貪穿深窺暗
不遺隙魍魎忌影逃巖嵌前年客中憶見之家人怨別方
喃喃荒山不知佳節至垂首凭案尋書蟬但怪流輝入敗

戶油燈失燄。留孤龕。起行陰林。不用炬。剝啄獨叩峰。西菴
虬蛇亂踏心。膽悸怪影走。石皆楓楠。卽呼道人共載酒。放
舟直下芙蓉潭。翻翻驚鷗落樹杪。吹笛正和烏飛南。今年
在舍反寂寞。暗室困臥如僵蠶。乾愁無端負良夜。月固不
言我則慙。人無賢愚競翫賞。況我清景性所耽。忽憶諸君
隔河水。持被就宿聆高談。爲呼老婢埽庭宇。一席盤飢梨
與柑。江城重閉萬家寂。樓鼓近聽纔過三。空階淒其覺露
泣。虛牖窈窕疑煙含。婆娑欲留月伴影。素鸞西下煩停驂。
明宵復出已難似。動別經歲嗟何堪。尊前此月又此客。世
所難遇心應諳。關山幾處未解兵。擊柝不寐愁丁男。南鄰
歌舞北鄰哭。月雖同照異苦甘。何人爲我揮天戈。乾坤多

難俱平。戢行者得還。居者樂清光。所及恩皆覃。懸知此願
未易遂。憂來舉盞從沈酣。須臾衆散曉蟲急。古桂吹落青

穆穆

開合變化似杜
排真安帖似韓

送葉卿東游

問君辭家今幾年。布衣綫斷芒鞋穿。江湖夢回燈火夜。聽
雨每憶山中田。兵戈忽斷故鄉路。雖有兩足歸無緣。上書
願雪父兄恥。畫地聚米籌山川。居然無成困逆旅。白日但
看孤雲眠。時人不容禰生傲。坐客豈信毛公賢。黃金已盡
酒徒散。壯士反爲兒女憐。饑吟倚壁氣未餒。有似病鶻棲
荒煙。却欲南游探禹穴。僕夫整駕雞鳴前。波濤翻江畏饑
鱈。霧雨連海愁飛鳶。相逢誰肯問憔悴。山水自爲窮人妍。

乾坤無家去何止。飄泊不異迴風船。區區願君自愛惜。今古遇合無非天。亂離貧賤何足歎。王孫亦在道路邊。我今豈少四方志。讀書坐破牀頭氈。恩讐兩無欲。誰報送子空歌寶劍篇。自寓抱負磊磊落落不同尋常送人

草書歌贈張宣

昔聞汝祖東吳精。醉傳草聖醒而驚。汝今能飲不滿杓。逸氣欲與相崢嶸。高堂把筆若把槊。長綃一拂悲風生。陰垂大澤雷雨過。響破巨峽波濤傾。颺游絲。習晴晝。落落高斗迴寒更。飲猿連臂深澗絕。饑鶻捩翅荒煙橫。自言靜裏觀萬物。故能變化窮其情。嗟余少本好劍舞。學書晚方從父兄。終焉懶惰不得就。塵滿硯田長廢耕。感時撫事每有

觸胸次。碑碣何由平。空齋往往出怪語。吟聲相應饑腸鳴。詩成請君爲我寫。墨瀟灑壁從奔崩。是時黃雲閉歲暮。返照忽出寒江明。手隨意到不畱阻。正似突騎陰山行。令嚴不聞戈甲響。一夜下盡名王城。安得師行亦如此。頃刻坐見乾坤清。嗚呼作歌聊贈汝。愈使流淚沾衣纓。奇偉馳驟波瀾不窮

獨游雲巖寄周記室砥

城西諸山非不奇。我游獨與茲山宜。紅櫻春開山後寺。白水夏滿山前陂。幽居況與山不遠。鐘鼓每到空齋帷。雨餘煙中落日下。曳杖往讀頭陀碑。兩崖蒼蒼石色古。枇杷樹高陰滿池。殿燈欲昏上羣鼠。埴鈴已靜蹲孤鴉。興來卽游興盡返。迎送豈要山僧知。困窮喪亂詎無感。正賴此境忘

吾悲嗟君何爲乃自苦破羈短策塵中馳挂帆能來亦未
晚浦口三日南風吹似昌黎山石詩

明皇秉燭夜游圖

華萼樓頭日初墮紫衣催上宮門鎖大家今夕宴西園高
熱銀盤百枝火海棠欲睡不得成紅粧照見殊分明滿庭
紫燄作春霧不知有月空中行新譜霓裳試初按內使頻
呼燒燭換知更宮女報銅籤歌舞休催夜方半共言醉飲
終此宵明日且免羣臣朝只憂風露漸欲冷妃子衣薄愁
成嬌琵琶羯鼓相追逐白日君心歡不足此時何暇化光
明去照逃亡小家屋姑蘇臺上長夜歌江都宮裏飛螢多
一般行樂未知極烽火忽至將如何可憐蜀道歸來客南

內淒涼頭盡白孤燈不照返魂人梧桐夜雨秋蕭瑟沈確
光明燭二語活用聶夷中田家詩
意與題中秉燭相應巧而不纖

方隱君山園

吳興城南山水勝竹樹參差萬家映幽深誰似隱君園車
馬不來雞犬靜兩溪迴通柳港曲一峰立對柴門正東西
別墅鄰更好孤權往來隨晚興總令種菜不種桃新製長
鑿木爲柄家童頗解候天時鄰叟還能論地性交交林路
翳復開活活野泉流不定清晨聞鳥欣獨往濃綠潑晴畦
色淨老葉垂根孤蚓號殘英綴梗羣蜂競乍紫新蔓喜籬
長欲送晚芽嫌土硬此時采擷自足飽肯爲食肝煩縣令
古來名園悉可數金谷辟彊誇獨盛鑿石圓開弄月池買

花深作行春徑。愛妾宵陪秉燭宴。狎朋晝接流觴詠。長年
歡樂豈知極。回首芳菲屬他姓。只今誰解問遺蹤。斷壁摧
垣無一剩。乃知厚業要德守。那得衰榮但言命。君能勤儉
遺子孫。應有佳名書郡乘。寫郊園種植質樸野
逸此境青邱獨到

聽教坊舊妓郭芳卿弟子陳氏歌

至正已亥作

文皇在御昇平日。上苑宸游駕頻出。仗中樂部五千人。能
唱新聲誰第一。燕國佳人號順時。郭姿容歌舞總能奇中
字官奉旨時宣喚。立馬門前催畫眉。建章宮裏長生殿。芍藥
初開赦張宴。龍笙罷奏鳳絃停。共聽嬌喉似鶯囀。遏雲妙
響發朱唇。不讓開元許永新。繡陛花驚飄豔雪。文梁風動
委芳塵。翰林才子山東李。每進新詞蒙上喜。當筵按罷謝

天恩。捧賜纏頭蜀都綺。晚出銀臺酒未消。侯家主第強相
邀。寶釵珠袖尊前賞。占斷春風夜復朝。回頭樂事浮雲改。
瘞玉埋香今幾載。世間遺譜竟誰傳。弟子猶憐一人在。曾
記霓裳學得成。朝元隊裏藝初呈。九天聲落千人聽。丹鳳
樓前月正明。狹斜貴客迴車馬。不信芳名在師下。風塵一
旦禁城荒。誰是花前聽歌者。從此飄零出教坊。遠辭京國
客殊方。閉門春盡無人問。綺袂青裙不理粧。相逢爲把雙
蛾蹙。水調涼州歌續續。江南年少未曾聞。原是當時供奉
曲。朝使今年海上歸。繁華休說亂來非。梨園散盡宮槐落。
天子愁多內宴稀。始知懽樂生憂患。恨殺韓休老無諫。傷
心不見昔人歌。汾水秋風有飛雁。此日西園把一卮。感時

懷舊盡成悲。含情欲爲秋娘賦。愧我才非杜牧之。沈確士云與少陵觀公孫大娘弟子舞劍器歌同一用意蓋惓惓故國之思意不在教坊弟子也而詩格則在元和長慶之間

憶昨行寄吳中諸故人

憶昨結交豪俠客。意氣相傾無促戚。十年離亂如不知。日費黃金出游劇。狐裘蒙茸欺北風。霹靂應手鳴雕弓。桓王墓下沙草白。彷彿地是遼城東。馬行雪中四蹄熱。流影欲追飛隼滅。歸來笑學曹景宗。生擊黃獐飲其血。皋橋泰娘雙翠蛾。喚來尊前爲我歌。白日欲沒奈愁何。迴潭水綠春始波。此中夜游樂更多。月出東方白雲裏。照見船中笛聲起。驚鷗飛過片片輕。有似梅花落江水。水夫差城南天下稀。狂游累日忘却歸。座中爭起勸我酒。但道飲此無相違。自

從飄零各江海。故舊於今幾人在。荒煙落日野烏啼。寂寞青山顏亦改。須知少年樂事偏。當飲豈得言無錢。我今齒髮雖未老。豪健已覺難如前。去日已去不可止。來日方來猶可喜。古來達士有名言。只說人生行樂耳。陳臥子云跌章云神似太白

登陽山絕頂

我登此山巔。不知此山高。但覺羣山總在下。坐撫其頂同兒曹。又見太湖動。我前海涌三十萬頃煙波濤。長風吹入度層嶂。不用仙翁赤城杖。峰迴秋礙海鶴飛。日出夜聽天雞唱。中有一泉長不枯。乃是蜿蜒神物之所都。老藤陰森洞府黑。樹上不敢畱棲鳥。常年禱雨車來此。投金符靈旗

風轉白日晦。馬鬣一滴露。三吳巖巒蒼。蒼境多異樵。子尋常不會至。探幽歷險未得歸。忽聽鐘來澗西寺。此時望青冥。脫略塵世情。白雲冉冉足。下起如欲載我昇。天行古來名賢總何有。只有此山長不朽。欲呼明月海上來。照把長生一瓢酒。浮邱醉枕肱。洪崖笑開口。秋風吹落浩歌聲。地上行人盡回首。

張節母詞

靈壽張明府嫡母

誰言妾有夫。中路棄妾身。先殂誰言妾無子。側室生兒與夫似。兒讀書。妾辟纈空房。夜夜聞啼烏。兒能成名妾不嫁。良人暝目黃泉下。按此詩見青邱集而小說家誤以爲章綸母金氏作竹垞已辯之矣

贈金華隱者

我聞名山洞府三十六。一一靈蹤紀真錄。金華秀出向東南。遠勝陽明與勾曲。樓臺縹緲開煙霞。天帝賜與神仙家。靈源有路不可入。但見幾片流出雲。中花子房之師赤松子。三千年前亦居此。飛行恍惚誰解尋。漫說至今猶不死。松花酒熟何處游。瑤草自綠春巖幽。羣羊臥地散如石。老鹿耕田馴似牛。聞有隱君子。乃是學仙者。自從入山中。不會到山下。世人莫知其姓名。以山呼之不敢輕。樵夫忽見苦未識。只疑便是黃初平。嗟我胡爲在塵網。遠望高峰若天壤。茯苓夜煮儻許餐。鐵杖來敲石門響。沈確士云松花瑤草一聯太白境佳

登金陵雨花臺望大江

大江來從萬山中。山勢盡與江流東。鍾山如龍獨西上。欲
破巨浪乘長風。江山相雄不相讓。形勝爭誇天下壯。秦王
空此瘞黃金。佳氣蔥蔥至今王。我懷鬱塞何由開。酒酣走
上城南臺。坐覺蒼茫萬古意。遠自荒煙落日之中來。石頭
城下濤聲怒。武騎千羣誰敢渡。黃旗入洛竟何祥。鐵鎖橫
江未爲固。前三國後六朝。草生宮闕何蕭蕭。英雄乘時務
割據。幾度戰血流寒潮。我今幸逢聖人起南國。禍亂初平
事休息。從今四海永爲家。不用長江限南北。起調
矯健

白雲泉

白雲不爲雨。散在清泉流。泉氣復成雲。山中同一秋。巖前
石竇幽寒處。雲自長浮泉自注。潛龍未起出深泓。渴鳥時

來下高樹。雲應無心飛上天。泉亦不肯隨奔川。老僧愛此
不復下山去。臥雲飲泉終歲年。筆妙
如環

題滕用衡所藏山水圖

滕君興在煙霞間。遠遊十年今始還。畫圖示我有層嶂。竟
似何處之名山。君言我初適東越。酒船橫渡鏡湖月。醉詠
謫仙天姥吟。海光欲曙清猿歇。瑤草春已生。便入金華行。
道逢牧羊兒。疑是黃初平。從此西游楚江水。大帆如雲挂
空裏。柁樓醞酒喚長風。一日看山一千里。不聞東林鐘。但
見香爐峰。波迷洞庭澗。樹隔瀟湘重。白沙翠壁經過好。就
中幾度曾幽討。麻姑壇上掃落花。堯女祠前薦芳藻。晚客
湖南逢雁回。登臨長上楚王臺。天從朱鳥峰頭轉。江自黃

牛。峽。外。來。蒐。奇。歷。險。今。應。倦。默。坐。舊。游。空。數。徧。時。向。明。窗。
玩。此。圖。好。山。一。一。皆。重。見。我。聞。君。言。自。歎。嗟。身。如。處。女。愁。
離。家。閉。門。讀。書。無。半。車。髀。肉。漸。生。空。鬢。華。牀。頭。塵。土。蔽。雙。
屐。何。不。踏。之。踐。苔。石。幸。逢。聖。世。道。路。平。五。岳。尋。真。皆。可。適。
便。當。往。抱。綠。綺。彈。松。風。行。盡。萬。壑。千。巖。中。仙。書。探。得。金。匱。
空。歸。來。誇。君。重。相。逢。握。手。一。笑。吳。門。東。趙雲松云置太白
集中不復辨別

雷雨護嬰圖

兒。衣。寒。母。衣。溼。風。雨。蒼。黃。歸。意。急。雷。忽。鳴。兒。忽。驚。抱。兒。與。
兒。同。死。生。樹。聲。吹。迴。水。聲。注。田。家。尚。遙。無。避。處。看。圖。誰。念。
亂。離。人。白。日。青。天。棄。兒。去。結意
警動

送謝恭

涼。風。起。江。海。萬。樹。盡。秋。聲。搖。落。豈。堪。別。躊。躇。空。復。情。帆。過。
京。口。渡。砧。響。石。頭。城。爲。客。歸。宜。早。高。堂。白。髮。生。盛唐

郊墅雜賦

江。水。舍。西。東。鄰。家。是。釣。翁。路。痕。深。草。沒。井。脈。暗。潮。通。籬。隔。
蔬。邊。雨。門。開。竹。下。風。不。因。時。賣。畚。何。事。入。城。中。
幽。事。向。誰。誇。孤。吟。對。晚。沙。浣。衣。江。動。月。繫。艇。岸。垂。花。行。蟻。
如。知。路。歸。鳧。自。識。家。一。尊。薌。屋。底。隨。意。答。春。華。
此。鄉。堪。避。地。亂。後。戶。翻。增。俗。美。嫌。欺。客。年。豐。愛。施。僧。帶。星。
耕。處。輒。照。雪。紡。時。燈。且。作。求。田。計。元。龍。豈。我。能。
野。色。迥。蒼。蒼。開。門。葉。滿。塘。僧。來。雙。屐。雨。漁。臥。一。船。霜。靜。裏。
修。香。傳。閒。中。錄。酒。方。平。生。當。世。意。到。此。坐。成。忘。

居似臨邛宅。耕非鄠杜田。已償輸稅米。未覓賣文錢。把卷憐長日。看花愧少年。翛然閉門處。楊柳桔槔邊。

春申君廟

封吳開巨壤。相楚服強鄰。名重三公子。謀疎一婦人。畫幃畱古像。珠履絕遺塵。簫鼓時迎祭。還憐舊邑民。衰貶俱見筆挾風霜

夜訪芭蟾二釋子因宿西澗聽琴

清夜獨幽尋。巖扉落葉深。許攜陶令酒。來聽穎師琴。人醉月沈閣。烏啼風滿林。應畱西澗水。千載寫餘音。絕妙琴韻

與劉將軍杜文學晚登西城

木落悲南國。城高見北辰。飄零猶有客。經濟豈無人。鳥過風生翼。龍歸雨在鱗。相期俱努力。天地正烽塵。沈確士云悲壯

兵後出郭

俯仰興亡異。青山落照中。民歸鄰樹在。兵去壘煙空。城角猶悲奏。江帆始遠通。昔年荆棘露。又滿闔閭宮。摹寫亂後風景渾融

沈鬱直摩杜陵之壘起結尤能振拔青邱五律當以此為第一而諸選家多不甄錄何也

送前進士夏尙之歸宜春

淒涼庾開府。老去復如何。故國歸鴻少。新朝振鷺多。菊荒應自歎。麥秀竟誰歌。相送堪愁思。蕭蕭楚水波。通首切前字

送舒徵士考禮畢歸四明

寄語關門吏。休輕尙布衣。叔孫聊應召。周黨竟辭歸。赤日京塵遠。蒼煙海樹微。送君還自歎。老却故山薇。

甘露寺

勝地江山壯。名林歲月遙。剎藏京口樹。鐘送海門潮。月黑龍光發。天清蜃氣銷。何當尋狼石。閒坐話前朝。雄整工切張承吉以

送張羽後夜坐西齋

閒齋聽鐘坐。憂緒悵多端。鳴雁雨中急。離人江上寒。秋燈下木葉。夜艇隔風湍。別後情蕭索。方知舊會歡。錢劉之間

送賈二進士歸省

年少擅詞華。曾看手八叉。晨裝歸路雨。春酒別筵花。馬帶雲過嶺。人同燕到家。罷官趨覲好。不是謫長沙。秀鍊

客舍喜姪庸至

客裏逢人喜。相過況阿宜。遠遊驚歲晚。多難惜門衰。帆落

江橋近。鐘來野店遲。一杯燈下語。渾似在家時。

題張靜居畫

楚客寫荆岑。秋雲隔浦陰。人家連橘塢。水廟映楓林。亂後清遊歇。愁邊遠色深。相看休向晚。怕有峽猿吟。字字老成

喜呂山人見過江館

非君憐夙契。誰肯顧柴門。日短清江路。風高大樹村。交呈新著橐。同發舊藏尊。莫便尋歸櫂。心懷未盡論。

冬至夜喜逢徐七

君來同客館。把酒夜相看。動是經年別。能辭盡夕歡。雪明窗促曙。陽復坐銷寒。世路今如此。懸知後會難。神完氣足

歸鴉

啞啞噪夕暉。爭宿不爭飛。未遂冥鴻去。長先野鶴歸。荒村流水遠。古戍淡煙微。借問寒林樹。何枝最可依。

寄託自高

送陳則

挾策去誰親。侯門不禮賓。愁邊長夜雨。夢裏少年春。樹引離鄉路。花驕失意人。一杯歌短調。相送欲沾巾。

錢塘送馬使君之吳中

樟亭離席散。遙發畫幡車。飛雉新阡麥。啼鶯故苑花。望山登郡閣。行水到田家。莫道凝香句。前人獨可誇。

徐山人別墅

茶香孤墅發。竹色四鄰分。掃地侵蟲字。開窗散鳥羣。樹涼池過雨。苔潤石生雲。我出無車馬。偏宜訪隱君。

寄錢塘諸故人

年少客名都。狂游每共呼。荷深箬在舫。竹靜矢鳴壺。明月潮千里。殘陽雨半湖。故人能念否。歡意近來無。

雨齋書寄楊孟載

動與世相妨。端居學坐忘。雨來池上樹。煙起竹間房。屋鳥非晴弄。闌花是晚芳。尋山期已阻。遙望奈蒼蒼。

風格似玉溪生

郊居

紛紛謝人事。寂寂戀吾居。細雨春雩後。斜陽社飲餘。岸花飛趁蝶。池葉墮驚魚。好了公家事。休令吏到廬。

甫里卽事

啞啞綠頭鳴。鬪翻紅尾魚。跳沙寬水狹。江穩柳短莎。長

路遙人爭渡處斜。日月欲圓時。大潮我比天隨似。否扁舟
醉臥吹簫。

晚登南岡望都邑宮闕

落日登高望帝畿。龍蟠山下見龍飛。雲霄雙闕開黃道。煙
樹三宮接翠微。沙苑馬閒秋獵罷。天街車鬪晚朝歸。明朝
欲獻昇平頌。還逐仙班入瑣闈。高華

奉天殿進元史

詔預編摩辱主知。布衣亦得拜龍墀。書成一代存殷鑒。朝
列千官備漢儀。漏盡秋城催仗早。燭明曉殿卷簾遲。時清
機務應多暇。閣下從容幸一披。

送沈左司從汪參政分省陝西汪由御史中丞出

重臣分陝去臺端。賓從威儀盡漢官。四塞山河歸板籍。百
年父老見衣冠。函關月落聽雞度。華岳雲開立馬看。知爾
西行定回首。如今江左是長安。沈確士云音節氣味格律
詞華無不入妙青邱集中

為金和
玉節

清明呈館中諸公

新煙著柳禁垣斜。杏酪分香俗共誇。白下有山皆繞郭。清
明無客不思家。卞侯墓上迷芳草。盧女門前映落花。喜得
故人同待詔。擬沽春酒醉京華。王貽上云三四神韻
天然古人亦不多見

金陵喜逢董卿併送還武昌

兵後匆匆記別離。兩年音問不相知。武昌樓下初來日。幙
府山前忽見時。上國花開同醉少。大江潮落獨歸遲。莫嗟

握手還分手。此會從前豈有期。清空如話

送葉判官赴高唐時使安南還

銅柱崖前使節過。貢隨歸騎入京多。一官暫遣陪成瑨。片語會煩下趙佗。曉拜賜衣辭絳闕。秋催征棹渡黃河。政餘好賦登臨詠。聞說州人最善歌。沈確士云漢南陽太守成瑨任功曹岑暉時謠曰南陽太守岑公孝宏農成瑨但坐嘯三語切判官四語切使安南還也如此運古乃見典切一結切高唐

送鄭都司赴大將軍行營

上公承詔出蓬萊。立馬風煙萬里開。賜履已分無棣遠。舞千還見有苗來。牙前部曲多收績。幙下賓僚更倚才。後夜軍門知子到。郎星應是近三台。典重

謁甫里祠祀陸魯望

衣冠寂寞半塵絲。想見江湖獨臥時。遁跡虛煩明主詔。感懷猶賦散人詩。釣魚船去雲迷浦。鬪鴨闌空草滿池。芳藻一杯誰為奠。鼓聲只到水神祠。弔天隨子宜有此高曠之作

送何記室游湖州

暮雨關城獨去遲。少年心事劍相知。故人當路輕貧賤。倦客逢秋惡別離。疎柳一旗江上酒。亂山孤艇道中詩。水嬉散後湖亭廢。此去煩君弔牧之。歸愚謂疎柳一聯詩雖佳不必定是湖州詩然此但寫途中所見之景結句仍點出湖州若必句句數典亦復何味歸愚之於青邱好為奇論大率如此

江上寄丁校理昆季

望裏煙生是子家。草堂應近鶴鴿沙。江汀每恨無舟渡。野墅空憐有酒賒。半雨暮成風外雪。孤梅春動臘中花。相思

尙隔前村遠，獨倚柴門數去鴉。五六刻畫而自然

聞朱將軍戰歿

江浦戈船赤幟稀，孤軍落日陷重圍。鏡中蛇墮占應驗，牙上梟鳴事已非。殘卒自隨新將去，老親空見舊奴歸。聞雞此夜誰同舞，西望秋雲淚灑衣。沈著

送滎陽公行邊

風捲雙旌雪覆羈，遠騎白馬出行邊。兵馳空壁三千幟，客宴高堂十萬錢。屏裏舊圖魚復陣，燈前新注豹韜篇。功成他日論諸將，只有荀郎最少年。俊亮

登涵空閣

滾滾波濤漠漠天，曲欄高棟此山顛。置身直在浮雲上，縱

目長過去鳥前數杵秋聲，荒苑樹一帆暝色太湖船。老僧不識興亡恨，只向遊人說往年。清遠一結尤有深意

辭戶曹後東還始出都門有作

詔貳民曹出禁林，陳辭因得解朝簪。臣材自信元難稱，聖澤誰言尙未深。遠水江花秋艇去，長河宮樹曉鐘沈。還鄉何事行猶緩，爲有區區戀闕心。忠愛自寫景中傳出

吳城感舊

城苑秋風蔓草深，豪華都向此銷沈。趙佗空有稱尊計，劉表初無弭亂心。半夜危樓俄縱火，十年高塢漫藏金。廢興一夢誰能問，回首青山落日陰。此感張士誠之亡也青邱不應其辟宜其薄之

送宋孝廉南康葬親

長揮客淚楚雲東。故國江山百戰中。遺觀十年嗟未掩。歸舟千里喜纔通。遠途敢避風濤惡。舊隴應知草樹空。料得南岡廬宿處。夜深猿鳥泣西風。一氣渾成不假。瑤飾下篇亦然。

得亡友周履道記室在繫所詩次韻

擬出置羅再卜鄰。死生俄判兩吟身。百年豈料逢今日。四海何由見此人。吳地有園花已盡。楚山無塚草空新。一篇幽憤時時讀。風雨寒燈夜獨親。按履道名砥。吳人工詩。元未從軍。會稽為明祖所誅。傳友德。廖永忠等征蜀。夏主明昇降。
喜聞王師下蜀。按洪武四年帝遣征西將軍湯和及蜀國兵銷太白。低將軍新拜漢征西浮橋已毀。通江鷓進鼓初鳴。突水犀不假五丁。開道遠俄看萬甲積。山齊從今險阻無人恃。夸貢南來盡五溪。

送倪賢良歸吳門

數千里外久相違。十八灘頭偶獨歸。自說病來辭幕府。只因愁絕念庭闈。吳歌重把還鄉酒。蠻布猶穿過嶺衣。話盡三年遊歷事。滿庭風雨送斜暉。

闔閭墓

水銀為海接黃泉。一穴曾勞萬卒穿。漫設深機防盜賊。難令朽骨化神仙。空山虎去秋風後。廢榭烏啼夜月邊。地下應知無敵國。何須深葬劔三千。

西塢

空山啄木聲敲鏗。花落水流縱復橫。松風吹壁鶴翎墮。梅雨過溪魚子生。尚有人家機杼遠。更無塵土衣裳輕。斜陽

已沒月未出樵子歸時吾獨行

宿張氏江館

極浦荒雲一櫂行。遠投江館駐宵程。客中得酒銜悲喜。亂後逢人說死生。木葉未空寒鳥聚。海潮欲上曙雞鳴。正憐此地無驚擾。歸夢如何又入城。哀怨而不頽墮

送李使君鎮海昌

海風千里捲雙旌。按轡初聞屬部清。人雜島夸爭午市。潮隨山雨入秋城。鳴狐不近睢陽廟。突騎猶屯廣利營。肯墮帳中容我醉。夜深燃燭臥談兵。

寄倪隱君元鎮

名落人間四十年。綠蓑細雨自江天。寒池蕉雪詩人畫。午

榻茶煙病叟禪。四面荒山高閣外。兩株疎柳舊莊前。相思不及鷗飛去。空恨風波滯酒船。通體明秀三四妙切雲林身分

次韻西園公詠梅

如何天與出塵姿。不得芳名入楚辭。春後春前曾獨採。江南江北每相思。微雲淡月迷千樹。流水空山見一枝。擬折贈君供寂寞。東風無那欲殘時。青邱梅花九首語多重復本非集中上乘猶王漁洋之秋柳也此首則氣骨高妙不即不離可稱絕唱

早春寄王行

江水江花只自春。不知容易解愁人。山川寂寞衣冠淚。今古消沈簡冊塵。草草逢人空識面。凶凶為客莫容身。十年憂患誰相慰。賴得君家是近鄰。此詩似元亡後作故語極淒楚

暫宿行營舟中

蒹葭霜露冷侵船。落雁驚烏總未眠。戍卒獨明高柵火。居人同宿廢村煙。醉中遠夢欺長夜。亂裏窮愁拆壯年。莫問身閒何到此。久思提劍學防邊。

岳王墓

大樹無枝向北風。十年遺恨泣英雄。班師詔已來三殿。射鹵書猶說兩宮。每憶尙方誰請劍。空嗟高廟自藏弓。樓霞嶺上今回首。不見諸陵白露中。
沈確士云鳳洲作英氣勃發讀此和平溫厚之篇又爽然失矣又云通首責備高宗居然史筆

送梅侯赴錢塘

一鶴隨車到郡朝。剡山殘水尚蕭條。盤藏秋塚金方出。箭

插寒沙鐵未銷。重見花開非舊賞。初聞麥秀是新謠。幾時南作諸侯客。釀酒江亭看晚潮。
亦亂後之作

上巳有懷

春寒渾未減征衣。愁對佳辰坐掩扉。江上琴書留滯久。水邊車馬被除稀。閒園細雨梨花落。廢苑平蕪燕子飛。欲覓蘭亭會中友。幾人遷謫未能歸。
清圓 賦帖

次韻金文學送弟往海上

小陸賢如大陸賢。亂離爲客最堪憐。橫經海上知虛席。打鼓津頭看發船。麥氣曉晴田雉雊。蘘香春暖野鷺眠。明朝夢斷生芳草。風雨孤舟過練川。

寒山寺送別

楓橋西望碧山微。寺對寒江獨掩扉。船裏鐘催行客起。塢中燈照遠僧歸。漁村寂寂孤煙近。官路蕭蕭衆葉稀。須記姑蘇城外泊。烏啼時節送君違。

靜境可思此等詩柄淺人不能作亦不能賞

送顧軍咨

新柳休攀短短條。離愁似雪未能銷。春回廢苑還芳草。人渡空江正落潮。德曜宅前今獨去。平津門下舊相招。重來莫在花開後。擬聽狂歌醉幾朝。

淵源堂夜飲

懸燈照清夜。葉落堂下雨。客醉已無言。秋蛩自相語。

題雜畫

空山萬株木。靄靄秋多晦。屋在白雲中。人歸白雲外。

山禽欲定棲竹風。苦難靜。殘雪墮。驚梢條條。一窗冷。

爲外舅周隱君題畫

山深嵐氣寒。高齋掩窗臥。林間踏葉聲。知有樵人過。

幽寂

西寺晚歸

遠寺別僧歸。隨鐘出煙嶺。犬吠竹林間。斜陽見人影。

襄陽

得家書

未讀書中語。憂懷已覺寬。燈前看封篋。題字有平安。

陶秘書廣陵送別圖

暮雨潮生瓜步春。山樹繞蕪城。惆悵離舟欲發。江南煙寺

鐘聲。

六言絕調

楊氏山莊

斜陽流水幾里啼鳥空林一家客去詩題柿葉僧來供養
藤花詩中有畫

聞舊教坊人歌

渭城歌罷獨淒然不及新聲世共憐今日岐王賓客盡江
南誰識李龜年似劉賓客

秋柳

欲挽長條已不堪都門無復舊參參此時愁殺桓司馬暮
雨秋風滿漢南

山新秋夜同周著作宿婁浦

小解寒依竹浦雲酒闌相對說離羣一聲新雁誰先聽今
夜江南我共君神韻獨絕

送陳秀才還沙上省墓

滿衣血淚與塵埃亂後還鄉亦可哀風雨梨花寒食過幾
家墳上子孫來視唐人清明幾處有新煙作尤愴惻

吳宮詞

芙蓉水殿屨廊東白苧秋來不耐風教得君王長夜醉月
明歌舞在舟中

秦宮詞

宮閉驪山靜管絃翠華巡狩去經年掖庭無用恩難報願
上蓬萊采藥船

讀儀秦傳

二子全操七國權朝談從合暮衡連天如早為生民計各

與城南二頃田連上二首義山詠史之作

宿蟾公房

一禽不鳴深樹煙。明月下照高僧禪。獨開西閣詠清夜。秋河欲墮山蒼然。清峭

風雨早朝

漏屋雞鳴起溼煙。蹇驢難借強朝天。却思春水江南岸。閑聽篷聲臥釣船。

題趙魏公馬圖

校尉當年執策迎。千金遠購貳師城。一歸天廐嗟空老。立仗原來用不鳴。無限慨惜妙在不露

宿圓明寺曉起

客起燈前夢尚迷。滿城殘月曉峰西。應知野寺非山店。只聽鐘聲不聽雞。

吳王井

曾聞鑒影照宮娃。玉手牽絲帶露華。今日空山僧自汲。一餅寒供佛前花。冷豔

消夏灣

涼生白苧水浮空。湖上曾開避暑宮。清簟疎簾人去後。漁舟占盡柳陰風。

春日漫興

水邊簾幕遠籠花。游女時時出浣紗。記得橫塘沽酒處。畫船明月載琵琶。

柳塘飛燕圖

身輕不耐晚多風春盡迴塘落絮空楊柳陰迷三十里畫樓何處捲簾櫳

會聞聲響... 空山... 畫樓... 柳塘... 飛燕... 圖... 身輕... 不耐... 晚多... 風春... 盡迴... 塘落... 絮空... 楊柳... 陰迷... 三十... 里畫... 樓何... 處捲... 簾櫳

